

東
華
續
錄

東華續錄

臣周滄蕃恭校

乾隆十五年庚午春正月丙午諭國家欽恤民命德洽好生至於
鰥寡殘獨尤所矜憫是以定有獨子留養之例凡屬情輕俱已霽
恩減等惟是愚民無知往往輕身鬪狠不知留養爲格外施仁或
轉恃此爲倖免之路以致罹於法網因於案情稍重或理曲尋覺
金刃重傷雖經督撫聲請仍以原罪定擬不准留養固屬該犯罪
所應得但聲請之案不過尋常鬪毆等類斷不致入於情實徒使
淹禁囹圄不得侍養而窮老孤孀無所倚賴深爲軫惻朕思此等
罪犯本非有謀故重情爲常赦所不原既經定擬本罪拘繫逾時
已足馴其桀驁之氣應量爲末減俾得自新上年秋審此等案犯

經九卿定擬矜減者止有二起餘仍監候著該部查明各犯祖父
母父母見存果無次丁侍養俱以可矜減等請旨發落嗣後獨子
犯罪未邀寬減者該督撫於秋審朝審冊內聲明九卿覆覈時照
此辦理以昭軫恤無告之意著爲例○免直隸山西河南浙江未
完耗羨銀兩免江蘇安徽山東耗羨十分之六○丁未 上奉

皇太后至 定太妃宮祝九旬壽○諭張廷玉大學士員缺會降
旨俟伊南還日開列今張廷玉旣不知朕恩大學士缺不應久待
總督張允隨係 皇考時簡擢封疆久經委任資格已深向來亦
有由總督入閣者著卽補授大學士雲貴總督員缺著碩色調補
兩廣總督員缺著陳大受補授吏部尙書員缺著梁詩正補授其
協辦大學士亦卽著梁詩正協辦兵部尙書員缺著李元亮補授
○定領侍衛內大臣班次在協辦大學士前○戊申起董邦達爲

內閣學士

閣學士內

○辛亥命王公等年節列儀仗乘轎上朝常朝

俱乘馬滿洲文職大臣非年及六旬不准乘轎○壬子準噶爾台

吉策旺多爾濟那木扎勒遣使臣尼瑪等謝准增貿易人數恩並

賁方物○癸丑調莊有恭爲戶部侍郎以孫嘉淦爲兵部侍郎○

命崔紀以右副都御史銜提督江蘇學政調李渭爲山東布政使

以德舒爲安徽布政使

由太僕寺卿遷

○甲寅命奉天州縣缺出選用旗

員○准甯古塔流民入籍○丙辰賜大學士忠勇公傅恆照宗室

公等例用對引馬○戊午賜準噶爾台吉策旺多爾濟那木扎勒

敕書曰據台吉奏肅州貿易之人蒙恩加增百名感戴陳謝殊屬

敬順朕甚嘉之至奏稱所有唐古特喇嘛已多亡故懇每次差數

十人往唐古特二博克達四大廟黃教各廟請安等語爾使臣尼

瑪等亦經口奏及此朕爲天下至可行之事斷無不允行不可行

者雖懇求亦不許昨爾奏來肅州貿易人少不足照看朕卽照所請准加百名從前爾父噶爾丹策零奏請爲爾祖策旺阿喇卜坦差人三百名往西藏熬茶朕特加恩派大臣官兵照看並賞沿途牲畜路費至藏完成此事續又據爾奏請爲爾父噶爾丹策零差人三百名熬茶朕亦准爾照前辦理似此應行大事朕一一俯從若非此等事則斷不准行從前降旨甚明今爾又奏請每年差二三十人在唐古特地方行走是以斷不可行之事來奏也爾意以已准爾等往藏熬茶兩次未必再准前往是以妄生冀倖殊不知果有前此大事朕原未嘗禁止往藏今無故每年令二三十人前往不惟事有不可卽照爾所請日後又必言人少請多增人數矣將每年必派官兵照看爾往來之人可乎況從前往藏熬茶時藏內郡王珠爾默特那木扎勒曾奏請停止準噶爾人往藏朕若准

爾所請則珠爾默特那木扎勒所奏豈竟置之不問乎爾等卽不
用朕官兵照看以己力潛往藏地珠爾默特那木扎勒亦安肯容
納乎但今爾地有自藏延請喇嘛大半亡故誠恐黃教日泯朕方
欲廣演黃教豈肯令爾地之教日就漸滅今爲爾詳度朕中國大
廟有名呼圖克圖藏內挑取有德行喇嘛及各處有學業喇嘛皆
住持其中爾等將喇嘛內聰穎者挑取十名或二十名送至京師
在大廟勤學三四年令其回去卽可助行黃教但此學經喇嘛須
擇年少之人學成時可以行教三四十自後不得每年差來必
俟人數將完方准再行挑送學習此特恐爾處黃教漸廢是以多
方爲爾籌畫非必欲爾處喇嘛赴京也爾若不願送喇嘛來學卽
可中止如復以差人至藏爲請則斷不許爾惟當感戴朕恩永圖
承受勿妄生他念勉之○辛酉諭軍機大臣等據駐藏辦理事務

副都統衙紀山奏王珠爾默特那木扎勒呈稱伊父頗羅鎮在時聘定青海親王旺淑克長女今額爾克錫喇奏稱從前許聘之時並未指定某女彼遊牧處見無協辦事務之人意欲留伊長女將伊次女嫁與蒙大皇帝特命臣等勿傷和氣善全此事謹遵恩旨停止迎娶旺淑克長女卽咨明迎娶伊之次女等語從前朕因不知此情曾諭珠爾默特那木扎勒今備陳許聘緣由遵奉朕旨停止迎娶旺淑克長女願娶次女甚屬誠敬由此觀之珠爾默特那木扎勒尙知畏懼是以朕命班第以大理曉諭額爾克錫喇應將長女嫁與珠爾默特那木扎勒之子則珠爾默特那木扎勒必感朕恩一槩不疑於事甚屬有益今珠爾默特那木扎勒又稱伊兄珠爾默特策布登舉兵七百直取錫可爾城漸侵至藏如此時不急息事耽延日久珠爾默特策布登未免投赴進噶爾汝等速行

咨寄傳清拉布敦令其親身抵藏曉諭珠爾默特那木扎勒諭以
汝弟兄始初不睦大皇帝亦鑒知矣今汝兄珠爾默特策布登雖
統兵七百向藏進發然道路險峻知汝各路備兵焉敢來侵如其
畏罪急迫往奔準噶爾則藏內不能靖矣且於爾父子兄弟名分
亦殊未善是以皇上憐汝父之忠誠念汝等原係弟兄特命和爾
兄弟王可遣使會同滿員令汝兄遵旨速行進藏伊如知感朕恩
卽釋其罪與委員一同進藏將與汝不睦因而稱兵之故善自曲
陳亦卽不究止期和爾兄弟藏內永遠安靖以全汝父始終勤勞
之名如此和其兄弟使之息事則省力多矣如或珠爾默特策布
登竟負朕恩執迷不悟顯係背叛何可姑容汝等自應飭令珠爾
默特那木扎勒作速勦滅勿致逃奔準噶爾方爲妥協此事朕本
欲差尙書納延泰前往辦理但納延泰須數月方到且珠爾默特

那木扎勒聞有欽差未免生疑是以寄諭汝等卽如朕訓辦理具奏朕聞珠爾默特策布登之子見在藏內汝等亦加意衛護勿致傷害以絕伊父歸誠之志此旨並未傳諭紀山如傳諭紀山珠爾默特那木扎勒亦必知之知則未免又生疑慮於事轉覺無益汝等速行盡力妥辦毋忽○壬戌命工部侍郎劉綸軍機處行走○

甲子山東巡撫

準泰請修建行宮嚴飭之○戊辰以鶴年爲內閣學士

山翰林院侍講學士遷

○己巳命正月上辛在立春前改次辛祈穀載

入祀典○命張允隨爲東閣大學士兼禮部尙書○辛未諭拉布

敦見在奉差工部辦事需員著勒爾森兼管工部侍郎事務○癸酉諭車駕巡幸毋得遷壑墳墓○大學士公傅恆等奏審明瞻對

案內擬流之羅於朝王世泰並貽誤軍機之李質粹宋宗璋及飯番革松結等各依律定擬得旨李質粹宋宗璋辦理瞻對案內貽

誤軍機原係上年情實候句之犯後聞瞻對一案慶復信任王世泰羅於朝聽汪結之言有革松結之罪令與俄木丁往來交結因而故縱班滾捏稱焚死此事惟彼五人密定外人不得而知有此言陳奏者果爾則慶復設有成局而李質粹宋宗璋爲所欺瞞陷於不知自與同謀縱寇有閒朕愼重人命該犯等苟有一縷可寬不憚再三詳審是以暫行監禁提解王世泰羅於朝來京嚴行究質務得實情今經軍機大臣會同刑部審明王世泰羅於朝與革松結誘致俄木丁投獻如郎並無通同與謀縱放班滾情事而李質粹親在泥日寨初報班滾焚斃未確後卽附和慶復扶同捏飾宋宗璋辦理善後亦不將實在情形具奏各有本罪明白昭著在慶復初意以欽差大臣將至急圖先得如郎因用革松結誘致俄木丁投獻如郎空寨以爲己功迫班滾旣逃無從擒馘乃燒毀

泥日寨以焚斃奏報不復窮按一味欺蒙了局此事在諸臣人人無不知情實乃通同捏飾罪不容誅若辦理之初慶復卽專與王世泰羅於朝一二將弁革松結俄木丁一二番囚豫設成謀縱放班滾雖在至愚當不出此慶復已賜自盡罪無可加而李質粹以提督大員領兵專閫縱失渠魁不能弋獲且明知班滾未死一經慶復嚴駁遂附和改詳朋謀罔上宋宗璋身任總兵職應奏事既知班滾未死並不將實情入告及汪結稟知班滾下落又不竭力搜擒致令賊番遠遁種種欺飾俱屬法無可貸著照九卿覈定情實應斬本罪卽行正法革松結本係叛番彼時卽應處決今本案無可對質亦著卽照原擬絞罪正法王世泰羅於朝不過營伍偏裨聽提督差委旣非統領之員亦無奏事之責情稍可原但擬減流實爲漏網今經軍機大臣等改擬著依擬應斬監候軍旅爲國

家要務賞罰勸懲所繫至重必徹底根究研鞠實在情形區別明允方成信讞今既屢經確訊所當明正典刑以申軍律俾共知儆戒將此曉諭各督撫提鎮等知之○介福緣事降調以鄂彌達爲吏部左侍郎

原任湖廣總督

二月乙亥

上奉

皇太后巡幸五臺山啓鑾○諭官員及內侍

隨從人等踐踏田禾罪坐家主○免經過地方本年額賦十分之

三○丁丑禁四川兵役侵擾番地○己卯諭軍機大臣等拉布敦

策楞岳鍾琪奏稱接准紀山札稱珠爾默特策布登已於上年十

二月身故見在與該郡王商酌料理善後事宜等語摺內所稱珠

爾默特策布登之是否因病身故前此之果否稱兵俱在可疑可

信之閒紀山不免爲其所愚所論誠是至稱阿里克地方緊要請

將珠爾默特策布登二子內准以一人承襲其職之處則所見於

事勢未協夫以珠爾默特那木扎勒之乖張暴戾伊兄在日尙與稱兵構釁不能相容以致陷兄於死今伊兄已死無所顧忌又何有於其兄之子即使令其承襲伊又何甘令其晏然撫有故土是徒多生一枝節而於事毫無實濟也且理無兩是珠爾默特那木扎勒之告稱伊兄稱兵搶奪已有不遵王法之形身後自有當得之罪伊子豈可復令承襲如謂珠爾默特那木扎勒誣陷其兄則又當明正其罪非命將用兵大爲辦理不可於二者之中權其輕重則珠爾默特策布登既經身故其果否病死無從致詰而珠爾默特那木扎勒乖張暴戾將來亦未必長久若因此勞師動眾實仍費有用於無益之地有所不必雖明知爲彼所愚亦不妨姑且從權置之不問至慮珠爾默特那木扎勒以素所親信管阿里克地方歸併其權以增羽翼自不得不爲此慮但彼處頭人尙多傳

清拉布敦或就其中稍爲選擇令不致到彼滋生事端足矣珠爾
默特那木扎勒旣無與相敵之人伊亦無可構釁或從此安靜亦
未可定若伊終久有背叛之志則亦止可俟其形迹已露再爲料
理不必張皇債事先啓彼疑然伊若果露形迹則傳清拉布敦二
人在彼又不可坐失事機致誤大事可詳悉傳諭傳清拉布敦令
其因事就事謹慎辦理固不可忽略亦不可豫設成見過爲計慮
自朕觀之目今辦理之道實無別計也並諭策楞岳鍾琪知之○
庚辰諭馬靈阿原係署理侍郎看來不勝侍郎之任著補授詹事
其禮部侍郎員缺著介福補授○諭軍機大臣等今日頒發諭旨
後紀山奏摺隨到珠爾默特那木扎勒請將伊兄遺屍付伊辦理
並願撫養珠爾默特策布登之子紀山一一爲之代奏自朕觀之
珠爾默特策布登以無疾之人興兵赴藏忽焉而死適當其時看

此情節其爲可疑自不待言而紀山始終受其愚弄深信不疑與之水乳相合殊失大體國家因西藏地處僻遠特命大臣駐紮其地所冀得其情僞控制由我今乃爲所籠絡豈委任駐防本意耶但事既如此姑且佯爲不知如其所奏已詳悉另降清字諭旨著鈔錄寄與傅清拉布敦閱看此正前諭所謂從權辦理者相去遙遠虛實難明因事就事實亦不得不然傅清拉布敦到彼諸事留心務將始末情節一一據實具奏又據紀山奏稱被兵之處見在查明奏請賞恤珠爾默特那木扎勒之爲此奏不過見伊兄之擾害番民所以甚其罪耳其當賞恤不當賞恤尙在兩可之間著傅清拉布敦查察酌量如果被擾累量爲賑恤儻屬虛言則不必一一徇其所請總之珠爾默特那木扎勒狡詐叵測實非善類加以紀山辦理不善珠爾默特那木扎勒因而生心今事屬已往目前

暫爲甯息至將來作何光景原亦無從逆料惟諭傳清拉布敦當同心密商妥協不可輕發啓疑亦不可坐失機會前因有珠爾默特策布登之事紀山偏向珠爾默特那木扎勒未可倚任是以令傳清前往又令拉布敦到彼且暫同駐年餘另候諭旨召令還京將清漢諭旨一併鈔寄策楞岳鍾琪令其知悉○丙戌 上奉

皇太后駐蹕五臺山○己丑 上奉 皇太后回鑾○定邊左副

將軍固倫額駙蒙古喀爾喀扎薩克和碩超勇親王策凌卒遺疏聞諭額駙策凌以名藩尙主班崇懿戚在 皇祖時卽已宣力邊

陲勲猷懋著 皇考睿汪優隆晉爵親王任專閫外身先血戰殄

靖狡寇偉績丕昭益勤忠盡朕以王 兩朝勲舊倚毗彌殷寄重

長城倍加渥澤前聞邁疾遘命賜藥選醫令伊子馳驛侍奉復遣

侍衛前往存問方期漸就痊可忽聞溘逝深爲震悼特用加恩賜

銀一萬兩治喪命貝勒羅卜藏侍衛德山往奠茶酒允伊子所請
扶輿來京合窆固倫公主園寢到京之日朕親臨奠醑一應齊集
典禮俱照宗室親王典禮行考諡建碑俱如儀式自昔功臣勲戚
侑食 廟廷以王之功宜得配享 太廟雖蒙古親藩從未有與
配享者朕以王功在王室名勒旂常簡在久孚宜膺特典且令眾
蒙古知朕崇獎賢勞中外一體俾共知感奮益切勸勉並照和碩
賢親王之例崇祀賢良祠永垂秩祀以示朕酬庸展親優賢篤舊
至意○諭軍機大臣等前因參贊大臣穆克登額等奏稱額駙策
凌患病朕特令額駙之子車布登扎布與蘇巴什禮帶領太醫馳
驛前往朕意額駙偶然抱恙當卽痊可後穆克登額等又奏額駙
病重朕卽特遣乾清門侍衛德山前往看視續又遣貝勒羅卜藏
前去不意伊等未到而穆克登額等奏額駙已於二月初五日病

故額駙自 皇祖時至今始終竭誠直力忠勤匪懈功在國家今聞溘逝朕心不勝憫悼世子成袞扎布又奏稱伊父遺言身故之後乞附葬公主園寢卽此一節身後尙不忘戀關其一生實心爲國可知著照所請卽令德山與成袞扎布一同護送進口並賞銀一萬兩辦理喪事俟到京之日朕親往奠酒所有應行卹典與在京親王一體加恩其左副將軍印務暫令貝勒羅卜藏署理○壬辰諭各省錢糧偏災緩帶不得列入民欠○癸巳諭軍機大臣等前因珠爾默特那木扎勒弟兄構釁會傳諭拉布敦令其於抵藏時將藏地添駐官兵之處與傅清公同詳酌如果於事有濟卽以己意告知珠爾默特那木扎勒以從前撤兵伊兄卽有此舉動今欲爲奏請添駐以助聲勢使之不疑朕思添駐官兵原爲地方有事藉以聯絡聲援今珠爾默特策布登已死藏地無事若更議派

兵駐守多作張皇適足動其疑慮且議添兵丁不過數百設遇有事亦不足資彈壓旋撤旋設殊爲無益如拉布敦奉到前旨尙未告知珠爾默特那木扎勒則添兵之事竟可毋庸辦理如已經告知不便中止則仍遵前旨一面具摺陳奏朕自另降諭旨總之彼地事端已息一切務須鎮靜熟思詳慎以靖地方將此傳諭知之○御史儲麟趾奏四川學政朱荃之母在籍病故伊弟主事朱履端在京聞訃呈報四月有餘朱荃仍在蜀星馳按試其爲匿喪顯然應請下部嚴議得旨該部嚴察議奏○乙未大學士禮部議覆和親王弘晝等奏 圓丘臺面奉旨仍九五之數量加展寬請遵聖祖仁皇帝御製律呂正義所載古尺上成取九數用九丈二成取五數用十五丈三成仍取九數用十九丈旣合九五天數而幄次亦可加展廣深陳設器物執事人員得以從容進退實屬適

中等語謹按易大傳曰天數二十有五蓋一三五七九皆奇屬陽而五爲中數九爲老陽仍用九五之義展寬至爲精當今據奏以古尺計度上成取九數徑九丈二成取五數徑十五丈應如所奏惟三成徑十九丈雖奇數然非由九而生謂仍九數未盡脗合應將三成臺面取三七之數徑用古尺二十一丈則上成爲一九二成爲三三三三成爲三七於天數一三五七九旣全合計四十五丈於九五之義尤合又奏稱壇面甄塊奉諭改用金甄以期經久考原制上成九重二成七重三成五重上成圓甄取陽數之極自一九起遞加環砌以至九九二成三成圓甄不拘今壇面加廣上成仍照九九幔砌計每金甄一塊應長三尺六寸八分下寬三尺五寸七分上寬一尺查金甄舊式不過二尺二寸若依展寬尺寸燒造維艱若增用塊數又於原制取義不符請改用直屬房山

縣所產艾葉青石質性堅澤色應法象止須琢磨如式旣得寬長
隨宜復垂久遠等語查上成甃數自一九以至九九其義甚精至
二成圍甃不拘未免參差應請倣上成取義亦用九重由八十一
之數遞加環砌二成自九十至一百六十二三成自一百七十一
至二百四十三於體制方爲整齊金甃旣難改用應如所奏採艾
葉青石敬謹成造又奏稱 壇制每成四陛之外各用青色琉璃
闌板圍繞上成每面用九二成每面十七取除十用七之義三成
每面積五用二十五雖各成均爲陽數而合計三成總數並無取
義今請用乾策二百一十有六之數依九數分配三成上成每面
一九計三十六二成每面二九計七十二三成每面三九計一百
零八合爲二百一十有六之數惟原用琉璃闌板每塊長一尺三
寸有餘合今分配之數每塊應長四尺五寸有奇亦難另爲燒造

並請改用艾葉青石等語伏思闌板扇數加多則尺寸自然減少
應請合三成闌板共用三百六十扇應周天度數上成每面十八
扇四面計七十二扇二成每面二十七扇四面計一百八扇三成
每面四十五扇四面計一百八十扇臣等逐項悉按古尺合算略
爲增減皆與九數相合謹繪圖列數請旨交承辦衙門敬謹遵照
得旨是依議○辛丑大學士九卿議准御史王應綵奏前奉旨令
內外大臣公舉經學之士伏思草茅下士皓首窮經人往而書始
出歲久而學乃傳曾不得與今日應選之士同邀榮遇可爲深惜
請敕下內外大臣細加搜訪上其遺書果能斟酌羣言闡明奧旨
者量予旌獎其書藏諸祕府以爲績學之勸應令直省各衙門陸
續採訪進呈從之○癸卯 上至四聖口閱永定河隄工

三月乙巳

上駐蹕南苑行園○丙午諭大計軍政固三載考績

之義以示激揚但文武大臣具疏自陳雖屬遵循成例而於實政未覺甚有裨益蓋中外大臣皆朕所簡用既經委任其居心之誠否才具之短長舉在洞鑒之內如其不能稱職早已隨時甄別其待至三年而計去者實缺非要任而人非大過介在可否之間者至於大臣恪共職守正宜久任以收實效而屆期輒求斥退降旨令照舊供職拘成例而事繁文非崇實務本之道也至御前大臣領侍衛內大臣等或簡自勲戚或拔從宿衛其辦理各部卿長以及八旗職任俱量材器使非循資錄用者比且伊等多世沐國恩趨承左右論其情理亦不當引退就閒甘心暇逸而每至三年亦循例求罷是轉以疏遠自居其如君臣一體之義何卽如來保自皇祖時卽已侍直內廷迄今五十餘年雖年登七袞而受恩如此其深且久則自陳請解退職任者義當然乎抑明知其於理有

未安乎又何事此虛文爲也前因宗室王公兼辦閣部等職者俱係宗潢近派特旨令不必自陳嗣後御前大臣領侍衛內大臣御前侍衛乾清門侍衛等兼理閣部及八旗事務者遇大計軍政俱著不必自陳餘仍照舊例行○諭大學士張允隨久任封疆簡擢政府勤慎素著河道總督高斌宣力河務年近七旬俱著加太子太保戶部尚書蔣溥侍直禁廷辦理部務恪勤供職直隸總督方觀承兩江總督黃廷桂節制宣勞才猷練達俱著加太子少保以示優獎○再免薊州等十七州縣額賦十分之三○丁未敕建永定河 河神廟○己酉 上奉 皇太后還京師○辛亥 上親耕藉田○降德舒爲山東按察使以高晉爲安徽布政使

由山東按察使

遷

○壬子諭漢軍人員選補州縣舊例迴避直隸地方乃遠嫌避

勢之意邇來直隸州縣閒有滿員補用者並未議及迴避揆其所

由從前州縣原未補用滿員是以止定漢軍之例今既用滿員而未議及迴避自屬辦理疏漏朕思州縣親民之官五百里內旗莊地方鱗次接壤詞訟案件動相關涉自不使用滿員嗣後漢軍仍照舊迴避直隸其滿洲人員著迴避五百里以內所有見任人員著該部查明另行請旨其道府同知等官統轄之員雖非州縣可比但本員莊地有在所轄之內者亦屬未便著報明該督奏請調補盛京州縣今已槩用滿員其中有莊地在本境者亦著於部內呈明另行扣補著爲例○甲寅 孝賢皇后二週年 上詣靜安莊致奠○乙卯諭大學士張廷玉前因朕念其年老許令致仕回籍仍准配享 太廟屢沛莫大之恩而伊並不知感謝恩竟不親至本應如大學士九卿等所議治罪朕以耆舊老臣不忍加之罪譴僅削去伯爵仍以大學士休致邇來詳加體察實乃龍鍾昏愎

力不能支當時聞命之下精神短淺或心思實有不到而非出於恃恩疏節亦未可知且朕從前降旨乃使爲臣子者共曉然於事君之大義亦不爲張廷玉一人而發不然伊身已退矣朕之加恩保全已將畢乃生矣豈尙慮其敗官箴而妨政事而不爲之格外優容乎今中外臣工已具知大義之所在張廷玉綸閣舊臣宣力年久今日陛辭之際顧其衰耄朕心尙爲憫惻所謂善善欲長惡惡欲短茲仍特加異數以寵其行賜給御製詩篇手書二卷並御用冠服數珠如意諸物起程之日仍令散秩大臣領侍衛十員往送用示朕優老眷舊至意○丙辰諭甕山著稱名萬壽山全海著稱名昆明湖應通行曉諭中外知之○丁巳禮部議准湖北巡撫唐綏祖奏旌表尋常守節年例相符之婦督撫學臣給扁彙題刊碑載誌伏思督撫學臣給扁嘉獎似人臣得操表揚之柄且扁字

參差不齊請照百歲老人例敕內閣擬字給扁並載入會典遵行
應通行八旗各直省一體遵辦從之尋 欽定清標彤管四字○

戊午 皇長子永璜薨 上親臨賜奠○諭皇長子誕自青宮齒

序居長且年逾弱冠誕毓皇孫今遭疾薨逝朕心深爲悲悼宜備
成人之禮著追封親王一切喪儀該部詳察典禮具奏至彌留之
際遷移外所以便殯殮雖屬內廷向例但當沈靜疾亟令其遠遷
朕心實有所不忍况園亭不同大內著卽於皇子所居別室治喪
其親王爵卽令皇長孫縣德承襲朕近年屢遭哀悼之事於至情
實不能已然仰維負荷之重侍奉 慈闈自當以禮節情且皇長
子幼而質弱朕加恩顧復念其未能承受厚福原非端慧皇太子
悼敏皇子望其可屬承祧者此雖父子至情實不能忍而輕重所
繫朕豈不知明諭至此諸王大臣等可不必爲朕過慮矣尋追封

和碩定親王諡曰安○己未 上奉 皇太后至定親王殯前賜

奠○諭內務府禮部等議皇長子和碩親王喪儀於第三日移殯
靜安莊東園輟朝三日等語定議之意想因皇長子別室近在御
園之內不欲延留恐傷朕心其輟朝之期亦照親王定例但三日
移殯爲日太速朕實有所不忍且齒序居長禮當從優著改於第
五日發引殯旣未移亦不忍遽易常服視事著輟朝素服五日○
壬戌定親王移殯靜安莊 上親臨賜奠○癸亥履親王允禔子
殤 上幸履親王邸第慰安 定太妃○丙寅諭前經臣工條奏
四五品京堂京察列爲一等者請帶領引見又有奏布按二司應
入大計者俱未議准行朕思兩司承辦通省案件大小事務無不
由其擬議詳報督撫自必隨時體察優者隨時揭薦稍不勝任必
不姑容誤事何待大計之年方入舉劾議駁自屬允當至京官察

典屆期三品以上堂官尙具本自陳部院司員亦俱令引見而四五品京堂則不在自陳之例考覈之後亦不行引見雖有吏部都察院填註考語之例不過按冊過堂虛文應事其中龍鍾庸劣者既得姑容卽才具優長精力壯盛堪供驅策者亦無由自見於培養人材激敘官方之道蓋兩失之嗣後京察年分吏部開列王大臣等職名請旨特派數人將四五品京堂秉公分別一二三等及應留應去具摺奏聞帶領引見以定黜陟庶優劣分而人知激勸於實政有裨其王大臣之是否秉公據實亦不能逃朕洞鑒卽於本年爲始著爲令○諭據副都統銜紀山奏稱郡王珠爾默特那木扎勒請將伊子達爾扎策凌遣往阿里克地方駐守等語珠爾默特那木扎勒感念朕恩欲遣伊子達爾扎策凌防守要地所辦甚是但達爾扎策凌見係閒散並無官職若往阿里克地方管轄

兵丁不足以資彈壓達爾扎策凌著加恩作爲扎薩克頭等台吉
○己巳諭定安親王皇長子大故見諸大臣官員俱未薙髮或因
皇子尚未分府之故此等事件向無定例眾意俟過三七再行薙
髮所見雖是但不遇祭祀三七薙髮尙可今旣遇大祭恐於齋戒
之意未協所有執事隨祭大臣官員均著於四月初一日薙髮其
餘人等仍俟三七後可也○諭軍機大臣等據嚮導大臣努三兆
惠奏稱由杭州府渡江至紹興禹陵南鎮一路河道窄狹僅容一
船經過石橋四十餘座須拆毀過半旱地安設營盤地氣甚屬潮
溼等語朕初次南巡禹陵近在百餘里之內不躬親展奠無以申
崇仰先聖之素志嚮導及地方官拘泥而不知權宜辦理之道總
總以水道不容巨艦旱地難立營盤爲慮若如所議拆橋數十座
卽使於回鑾之後一一官爲修理其費甚鉅且不免重勞民力豈

朕省方觀民本意耶朕在宮中及由高粱橋至全海常御小船寬不過數尺長不過丈餘平橋皆可徑度最爲便捷越中河路旣窄日間乘用俱當駕駛小船石橋旣不必拆毀其原擬安立營盤二處必係灣岸稍寬可以停泊之地卽於此處造大船一隻專備晚間住宿更不必於旱地安營旣避潮溼且免隨侍人眾踐踏春花之患其駐宿大船惟取堅完旣不藉以涉大川破巨浪一應帆檣篙楫亦不必齊全所費不過造船工價二三千金過後物料尙可變用較之拆橋進艇多費周章者相去遠矣著詳悉傳諭該督撫等令其遵照指示妥協辦理○辛未禮部議奏定邊左副將軍和碩超勇親王策凌奉旨脩食 太廟入祀賢良祠製造龕位應於太廟東廡怡賢親王之次安設賢良祠應於怡賢親王左次另龕從之○是月廣西巡撫舒輅奏安南匪徒朝曉前附莫匪與安

南構壘後莫匪敗逃朝曉敘迹今復出爲患飭沿邊營弁加意嚴防報聞

夏四月丁丑命繪

壇

廟祭器圖式○己卯以明春巡幸江浙

命各截留漕糧十萬石備糴○乙酉富德以罷輟無爲革職以馬

璽阿爲左副都御史

由詹事還

○丙戌諭本年朕四十壽辰各省文武

大臣不必奏請來京祝嘏○戊子諭軍機大臣等河道總督高斌

回奏部駁臨黃臨運兩壩情形一摺部議以黃高清下勢難倒注

高斌則稱黃河水面高於運河五尺設遇大汛運河水面加長七

八尺至丈餘黃河偶未加長或雖長而較小於運則清水之下者

轉高下游中河難以容受即可啓放二壩引清入黃等語夫黃河

水面高於運河五尺非獨水面高乃其河底高也黃運河底旣高

下相懸即使運河盛漲非橫決旁衝卽下流漫溢成災何能使之

下相懸即使運河盛漲非橫決旁衝卽下流漫溢成災何能使之

轉而就高此理易曉非祕鑰難明之事而高斌仍復如此執奏不
過迴護前言此摺朕已批令原議之大臣議奏今思事既不行若
該部立議駁詰徒多往返終無了局若含混定議將謂河務中至
淺近之理竟不能知亦非政體是以特行傳諭令其知悉以全顏
面此摺不必交議一併諭令知之○諭據湖廣總督永興奏報原
任四川學政朱荃起程回籍伊家人稟報在重慶府聞訃丁憂二
月初一日赴成都交印初十日起程回籍三月初九日行至巴東
縣地方灣泊夜起失足落水拉救不及打撈未獲等語此等情甚
可疑朱荃若非潛蹤滅迹卽係投江自盡必非失足落水伊自上
年七月丁憂歲除封印之時尙趨緊開考其有意匿喪情節顯然
經御史參奏該部見在行查朱荃蔑倫傷化其心迹已不可問明
係聞訃之後乘未報出連考數郡賄賣生童以飽行囊一聞被參

之信知無可掩因託詞落水希圖了事伊家人戚屬從行者甚多豈有泊舟之後乘夜復起竟無一人知覺而聽其失足落水之理其隱匿實情通同捏報不問可知況家人不行護救又不及打撈已有應得之罪此外別有謀害等事俱未可知伊家屬前行此時應已抵家著傳諭永貴令其卽提朱荃隨從家人嚴行審訊務得實情卽速具奏並諭四川總督策楞湖廣總督永興巡撫唐綏祖知之○己丑諭今日侍郎管太常寺事伍齡安因額駙超勇襲親王策凌配享太廟位次開單條列具奏朕已另降諭旨辦理因詳闕配享諸臣名單其中如費英東額亦都諸臣皆佐命元勳汗馬百戰功在旂常是以侑享大烝俎豆勿替卽大學士鄂爾泰已覺過優於此益見張廷玉之不當配享而其配享實爲逾分在鄂爾泰尙有開闢苗疆平定烏蒙及經略邊陲諸勞績若張廷玉在

皇考時僅以繕寫 諭旨爲職此嫻於文墨者所優爲自朕御

極十五年來伊則不過旅進旅退毫無建白毫無贊襄朕之姑容
不過因其歷任有年如鼎彝古器陳設座右而已夫在昇平日久
固無櫛風沐雨躬冒矢石之事可以自見然亦必德業猷爲有功
社稷方足當之無愧張廷玉曾有是乎上年朕許伊休致回籍伊
卽請而見奏稱恐身後不獲蒙配享之典要朕一言爲券朕以
皇考遺詔已定伊又無大過何忍反汗故從其請並賜詩爲券夫
其所以汲汲如此者直由於信朕不及卽此居心已不可以對天
地鬼神尙可冒膺脩食之大典乎及其謝恩不至經廷臣議處朕
仍復加恩寬留原職並仍准其配享是在伊又當何等感愧乃仍
覲然以老臣自居並不知感且於陛辭之日賜賚優渥並令於起
身時仍派大臣侍衛往送伊遂心滿意足急思旋里適皇長子定

安親王之喪甫過初祭卽奏請南還試思伊曾侍朕講讀又曾爲定安親王師傅在大臣年老或患疾不能任事如徐本任蘭枝楊汝穀等何嘗不准其回籍若張廷玉則不獨任以股肱亦且寄以心膂尤非諸臣可比朕從前不卽令其回籍者實朕之以肺腑心膂視之逾於常格之恩而伊轉以此怏怏及至許其原官致仕許其配享則此外更無可希冀無可留戀惟以歸田爲得計矣前於養心殿召對奏稱太廟配享一節臣卽赴湯蹈火亦所甘心夫以一己之事則甘於赴蹈而君父之深恩厚誼則一切置之不顧有是情理乎使皇考仍在御見張廷玉今日之行爲亦將收回成命則朕今日不得不明頒諭旨以勵臣節張廷玉非但得罪於朕抑且得罪於皇考在天之靈矣且朕賜詩所謂可例青田原侑廟漫愁鄭國竟摧碑云者劉基在明原係從龍之佐有帷幄之

功而當時配享尙不免訾議今張廷玉自問果較劉基何若乎至魏徵仆碑事在身後今張廷玉見在更不待身後始有定論朕前加恩降旨仍准其配享臺垣諸臣卽應力陳其不當濫廁元勳之列而乃噤無一語御史中非無人卽有所觀望耳配享一節天下自有公論張廷玉亦當有自知之明今及其未至身後正可折中定論朕豈肯爲唐太宗所爲耶著將此旨並配享諸臣名單令其閱看自加忖量能否與本朝配享諸臣比肩並列應配享不應配享自行具摺回奏到日令大學士九卿等定議具奏尋奏臣以庸陋之材竊祿多年毫無建白不自度量妄思配享蒙 皇上訓示如夢方覺旣無開疆汗馬之功復無經國贊襄之益年衰識瞽愆咎日滋伏乞罷臣配享並治臣罪得旨大學士九卿議奏○庚寅琉球國護送遭風福建商船回籍優資之○壬辰諭阿桂前因墮

往軍營以招搖致獲重譴經部議治罪監禁朕特加恩寬宥令伊父阿克敦約束教導阿桂從前獲罪原因倚恃上司尙非身犯贓私者比伊向在司員中辦事猶知黽勉且阿克敦僅此一子今再行加恩著仍在吏部員外郎上效力行走俟有缺出題補○甲午超勇襄親王額駙策凌樞至清河 上親臨賜奠○乙未大學士等議奏致仕大學士張廷玉應請停罷配享仍革去大學士職銜以爲大臣負恩者戒得旨張廷玉配享 太廟一節朕之本意並無欲令其停罷之見二三年前大學士史貽直曾於面見時議及配享大典張廷玉不當濫邀朕知伊二人素不相協且漢人中有配享大臣亦足爲臣工之勸是以未經允行及上年許令張廷玉休致伊卽奏請面見汲汲以配享爲請求一言爲券朕卽允其請及其謝恩不至經大學士九卿議停其配享朕以 皇考成命早

頒仍曲示保全未允廷議在張廷玉卽不知朕心信朕不及而朕之始終加恩不欲停罷配享初未嘗有絲毫成見已可共白矣乃張廷玉受千載難遇之恩而毫不知感覲然自居老臣朕西巡時伊隨眾送駕乃加恩免罪後初次面朕也伊亦未曾叩首道旁且毫無惶悚激切之意仍在皇城內與留京總理王大臣同列海子接駕亦是皆眾人所共見者及陛辭之日朕仍賜令召見意以伊以老臣去國自必有嘉謨讜論規益朕躬合於臨別贈言之義而無一語及於國家政事古人居江湖而憂廊廟者固如是乎且奏稱去冬謝恩不至曾令伊子將緣由告知奏事太監未爲轉奏近日奏事太監有敢以大臣陳奏之言壅蔽遺漏而不爲轉奏者乎 皇考臨御以至朕躬能容此等奏事太監乎此在外人或未盡知張廷玉在軍機處行走數十年甯不知之而欲以此委過於

不足比數之小臣大臣居心豈當出此乎及遇皇長子之喪甫過
初祭卽請回南於君臣大義及平日師傳恩誼翹然不以動心其
意不過以志願已遂更無圖惟以歸榮故鄉爲急人臣如此存
心於國家無幾微繫屬依戀國家安賴有此臣也夫遭皇長子之
喪迫不及待欲歸故里在張廷玉則爲悖於大義在朕視之仍屬
小節朕非因小節而督責去位之大臣然小節如此又安望其臨
大事而能竭力致身乎在張廷玉老邁歸田豈更望其出力而我
大清國億萬斯年君臣一體休戚相維之誼所關甚大不可不剴
切明示以正名教之大閑且張廷玉去志本不始於今日當有訥
親時伊卽屢在伊前懇懇代奏訥親不敢明爲奏請而時時流露
其意彼時張廷玉尙未龍鍾豈一二年亦不能待而營營思退者
蓋自揣志不能逞門生親戚之素相厚者不能遂其推薦扶植之

私所積貲產又已足贍身家是以伊十餘年來僅以旅進旅退容默保位爲得計及一一獲滿所願輒圖遠引朕向之曲示優容者則以 皇考所貽卽古器亦加珍惜何況舊臣然亦以其原無大過耳今旣獲戾種種實乃得罪 皇考無可復加原宥適因伍齡安之奏閱配享功臣名單益見其不可濫邀是乃天理昭彰不容倖竊非分朕雖欲屈公議以全初念亦有所不能也況配享大典不但酬庸實以示勸在朕初無成心鄂爾泰張廷玉同奉配享之詔鄂爾泰在生時朕屢降旨訓飭較之張廷玉尙爲嚴切此亦在廷所共知然以大節不虧始終克全自應叨榮勿替而張廷玉居心行事如此若仍令濫膺脩食誠不足以服公論不足爲天下後世臣工之勸卽朕亦何以仰對 皇考在天之靈著照大學士九卿所議罷其配享至朕於張廷玉已格外加恩所議革去大學

士職銜之處仍著寬免並將前後情節詳諭內外臣工知之○己

亥調慧中爲吏部右侍郎

由盛京兵部侍郎調

五月甲辰諭貝勒貝子俱往紫禁城騎馬○丙午諭軍機大臣等傳清拉布敦所奏珠爾默特那木扎勒見經奏明前往薩哈地方有調動部兵搬運礮位等情形看來珠爾默特那木扎勒或因伊兄雖死其所屬頭人部眾不能帖服前往辦理其調兵動眾不過自爲防範或因伊兄弟構釁慮朕有問罪之舉伊等小見意謂離其巢穴可以苟延俱未可定總以心懷疑畏見自去冬以來傳清甫換紀山拉布敦又往同駐頻遣大臣到彼恐將伊王爵革除擒拏治罪種種猜疑是以作此行徑朕去年加恩賞賚及允伊與青海親王聯姻前後恩旨實足以釋彼之疑想尙未到如經奉到自必曉然喜出望外不復懷疑矣若謂其別有異謀則不必慮從來

有異謀者非有所貪圖希冀於所不當得則必禍患迫身出於不得已以珠爾默特那木扎勒言之伊身爲藏王操生殺而擅富貴俸賜所頒貿易所入歲獲重貲而且倚藉中朝聲勢眾蒙古皆與往來可得厚利伊更何所貪圖希冀若叛去則全無所得伊何所利而反耶至伊遠在天末雖有大臣往駐並不監制其行爲分奪其聲勢伊又有何拘束困苦而以逆謀自救耶利無可圖害無可避而謂其將有異謀誠過慮也且使果有異謀則西藏伊所駐紮何不據此舉事而轉至薩哈欲何爲耶此其有無俱可勿論至其性情乖張則所謂父不能得之於子者在朝大臣可制其進退予奪之大命尙不能使之一一守法奉公何論其本屬外藩地居極遠是豈教化法令之所能施卽如從前以五百兵駐藏何足禦侮况已經撤還若更令重駐彼第以五千之眾應之勢必不敵將見

番屬騷然兵民俱困天討未伸卽內地不勝其擾以此觀之惟當鎮靜持重聽其自行自止在我本無加罪之意在彼自不存致疑之端傳清拉布敦當領會此意並不必有心急令其釋疑轉多一番糾擾且靜以待之俟其回藏時情形若何再行奏聞前經降旨著班第往換拉布敦未免過速亦足致疑今已召紀山來京陛見面詢情形再令前往青海班第俟紀山到後往藏約計到藏當在冬閒彼時珠爾默特那木扎勒當已深知天朝德意積疑冰釋矣將此詳悉傳諭傳清拉布敦知之○丁未諭原任宗人府府丞劉藻因聞皇長子定安親王之事來京面請朕安並請赴皇長子喪次叩謁劉藻係母老奏明在籍終養之員離京千有餘里卽具奏差人請安未爲失禮而伊於孝賢皇后大喪及此番皇長子喪事俱親赴闕廷深知君臣一體休戚相關之大義伊在上書房行

走纔及數年尙有不忍愀然之誼以視張廷玉之身爲第一大臣
自朕在書房卽侍講讀繼又爲皇長子師傅行走至三十年之久
而漠然惟知自便者與之並較其相去何如也豈無可覲覲者則
總忘休戚之情而匪懈君上者必盡出希冀之念乎張廷玉聞之
其知愧否乎劉藻曾任內閣學士緣事降補仍給予內閣學士兼
禮部侍郎原銜伊親年老在堂需人侍奉天氣亦漸炎熱著賞給
伊母人參二斤劉藻著卽行回籍終養○戊申命江南再截留漕
糧五萬石備糶○庚戌 上詣 黑龍潭祈雨○辛亥諭 壽皇
殿恭奉 皇祖聖祖仁皇帝 皇考世宗憲皇帝聖容朕以時躬
詣行禮愜見優閑得申逮事之悃仰惟 太祖 太宗 世祖聖
容 列后聖容向於體仁閣函奉尊藏未獲修歲時展謁之禮粵
稽前代安奉神御或於宮中別殿或於寺觀淨宇本無定所國家

緣情立制宜極明備周詳敬念 列祖創垂顯承斯在永懷 先
澤瞻仰常新式衷 廟祫之儀期協家庭之制應卽於 壽皇殿
增修丹雘恭迎 列祖 列后聖容敬謹奉安於歲朝合請懸供
肅將裸獻以昭誠懇所有應行典禮著內閣大學士會同內務府
王大臣等詳悉具議以聞尋議恭查 太廟時享祫祭俱用太牢
籩豆 奉先殿前殿朔望用籩豆 後殿節令用果供今 壽皇
殿 聖容恭懸恭收之日請如 奉先殿後殿節令例致祭大祭
日如 奉先殿前殿朔望例致祭籩豆用陶每歲除夕內監詣
壽皇殿恭請 聖容恭懸每案供乾鮮果品十二羊豕肉二清醬
一爵三上香行禮元旦大祭獻籩豆上香行禮作樂獻帛爵不樂
舞不讀祝初二日如除夕供上香行禮畢恭收 聖容卽 殿尊
藏元旦詣 堂子 奉先殿行禮畢詣 壽皇殿王公隨行禮內

務府前期奏請除夕初二日

皇子輪班行禮掌儀司前期請樂

章用

奉先殿前殿朔望樂章掌儀司太監豫習上元節每日供

饔餼案如常儀秋季開晾

聖容宮殿監督領侍等派內監執事

祭日司香司帛司爵陳設祭品樂器贊禮典儀司樂掌儀司贊禮

郎執事如儀從之○諭各省督撫參劾不職屬員或請革職休致

或請降補改教皆地方公務並非應行密辦之事理當繕本具題

方合體制近來督撫有先具摺奏聞聲明另疏題參者尙屬可行

而亦竟有以摺奏代具題者究於體制未協所有摺奏之準泰等

已傳旨申飭著通行各省督撫凡遇此等參奏槩用題本以昭慎

重再向例各省參案除特參貪酷挐問質審等犯一而具題一面

摘印看守至其餘降革休致改教之員必俟部覆允行方令離任

此等人員既昏惰無能留一日卽多誤一日之事理應卽令離任

另委賢員速爲整頓方於地方有益且自該督撫出本以後該員卽已豫知不可保全而幸其印猶在手往往乘機舞弊卽瑣細無關緊要如田房稅契之類或本人或子弟或吏役以及素相往來之紳衿俱於印官將去未去之時恣意妄行及至部覆到日近者亦必二三月遠者或至半載以外此數月中何事不可爲卽丁憂人員尙有隱匿遲報者豈可任其踞缺營私殊非激敘官方整理民社之意嗣後各督撫於屬員有題請革職或勒令休致另行降補改用教職以及丁憂告病類應離任者一面具題一面卽行委員收取印信署事並將任內經手錢糧一一清查無得瞻徇著爲令○命刑部清理庶獄減徒以下罪直隸亦如之○壬子降歸宣光爲內閣學士起彭啓豐爲吏部左侍郎原任刑部右侍郎○癸丑諭入夏以來京畿雨澤未能霑足乃者十七日望月食旣雖春秋不書

月食未爲災異然垂象示儆惟應省愆修政以期仰格天心九卿

科道等其直陳闕失毋隱○以世臣爲盛京兵部侍郎

由內閣學士遷

○

己未諭熊學鵬奏上年秋審句決較前數年覺多近年臣工條奏更改刑名律例大槩多尙嚴厲請密降旨曉示內外臣工辦理一切刑名不可刻覈相尙條奏增設科條者槩行禁止等語熊學鵬此奏甚屬悖謬上年秋審句決之時經朕詳悉裁審其中如侵貪各犯蠹國殃民實乃法所不宥若止虛擬罪名槩從緩決則流風相煽愈積愈多爲吏治之大害不可不稍爲補救若謂因此而致雨澤愆期遂乃恣貪官汙吏之所爲一切置之不問徒使貪黷成風千百輩肆意婪肥身扞法網更復幸災樂禍冀雨暘不時以爲倖免之計適足以干天怒而召災沴豈得轉以此爲修省之要務乎京師地居燕朔春夏自來少雨而幅員旣廣則天災流行亦所

時有然朕宵旰焦勞當未降旨求言之先已寢食靡甯所望在廷臣工共思政治之實有關失處同心一德力圖修治若以辦理侵貪等案爲失之過嚴則前此未辦之時何以向年屢事祈禱且御極之初則共知爲諸事從寬者又何以水旱偏災各省亦時時入告而京師則自元年以至於今無一年不於春夏之交朕焦勞望雨或密禱禁庭或明頒諭旨卽目今外省如河南山東麥既有秋江浙等省春花俱獲豐稔見在雨澤勻調獨非共在版圖之內朕所臨御者乎能舉鵬雖爲此謬論朕慎持政柄必不爲浮言所動果使貪風未卽俊改無論京師一隅一時偶值雨未霑足設令更甚於此亦不因一時災祲而於立政之大經御世之大法廢而不舉違道徇人爲此姑息之政惟有斷之以理法在必行仍照上年辦理耳至內外間刑衙門在朕初年或不免有意從寬而謂近年

來專以刻覈相尚則可保其必無卽言官及外省臬司條奏律例
或比擬失當經部臣議駁者不一而足以此時刑獄而尚以爲過
嚴信爲罔知輕重之尤者矣當御極之初如從寬好名之習不能
去諸懷然元年二年之間亦何嘗不早比年閱事旣多深知爲治
必出於大公至正斯久而無弊方曰進臣工而申明邀譽之當戒
顧肯躬自蹈之乎然十五年來無時不以敬 天法 祖爲心無
時不以勤政愛民爲念無時不想得賢才以共圖政理此可無慚
衮影者人苦不自知惟工作過多巡幸時舉二事朕側身內省時
耿耿於懷在 圓丘 方澤諸壇暨 壽皇殿皆歲久應行修整
西山添建兵房亦非無益之費畿輔行宮不過修葺舊有且較安
營爲更省而公費足贍貧民供役無勞民力至巡幸則 聖祖時
歲凡數出不特稽古省方用彰盛典良亦我國家習勞之舊制雍

正四年 皇考會降

旨以武備不可廢弛官弁不可怠惰爲戒

然十三年中未經舉行八旗人員於扈從行圍諸事一切生疏近年稍覺嫻熟亦事之不可不行者且以吏治言之直隸較優於外省豈非常經巡省之明效乎然每一念及尙覺欣然於心從前劉藻嘗以工作進諫是以朕至今心慙其人至飭法縱奸思以感召休和如熊學鵬所云者直瞽論耳本宜議處但朕旣降旨求言熊學鵬卽識見迂謬姑從寬勿問特詳悉剖示令中外諸臣共知明刑弼教不可爲貪吏開倖生之路其有游談附和者必從重治罪熊學鵬摺並發○諭軍機大臣等據蘇昌奏稱該省從前風氣地方吏治雖不至於廢弛不免失之寬緩寬則縱恣易起無以儆惕人心緩則弊竇漸生無以肅清政務臣豈敢欲速苛求而寬縱闖茸之風不可不除等語從來後任嘗議前任之短及爲伊後任嘗

議亦復如前此外省錮習竟成故套然以碩色岳濬二人言之則其性情謹慎有餘而辦理地方諸事誠有流於寬縱之失蘇昌所論頗爲切中其弊今伊二人又同事滇南滇南民風醇樸事務本屬簡少更非粵省嶺海交錯習俗澆漓者比但係邊方遠處天末亦須隨時整飭不可一味因循遂致疲玩懈弛日甚一日此則封疆大吏所當深戒也自朕觀之整飭之道不在多設科條煩擾百姓如柳宗元所云日擊鼓號召其民轉致饕餮不暇惟在督察屬員令其以見在應行之事因地制宜一一實力行之百姓自霑實惠一邑得人則一邑治一郡得人則一郡治爲督撫者慎持綱紀廣諮諏而審觀聽聞葺怠事者必不姑容如此則政有經而民不擾較之徒事虛文無裨實效者相去遠矣不獨滇省卽在京在外無不皆然著傳諭碩色岳濬令知此意不得因議者訾其寬縱急

圖改絃易轍又致急遽煩苛亦不得專務息事甯人之名而不留意於釐奸剔弊昧明作有功之大道也○辛酉諭御史錢琦參奏總督黃廷桂授意州縣逢迎嚮導一摺據稱鋪設備極華靡器用備極精緻多者用至千餘金少亦五六百金等語御史職在風聞言事卽事之虛實尙難懸定而一有見聞卽以入告亦分所當然但所稱浮費多金並慮及將來該州縣等身家性命莫能自保則言之不免過當地方有司因朕南巡其中有闢葺不堪之員以辦差爲苦者或散布流言張大其事勢所必有卽如巡撫準泰參奏郟城令王植捏病求去狡詐避差其明驗也山東經過之處耳尙且如此何況江南今嚮導一過卽云慘淡經營若此明年朕駕親臨又當如何朕甫下詔南巡卽已若此當年 皇祖聖祖仁皇帝屢經巡省又當如何且周旋嚮導所費如許浩繁將係嚮導在途

揮霍乎抑係歸裝滿載乎朕召對各大臣及該御史面詢嚮導兆
惠據稱途次並未一進公館質之侍郎彭啓豐亦云來自江南目
擊無異是其出自傳聞已可槩見但言官既有此奏自當確查虛
實毋致奉行不善然如錢琦所請交黃廷桂回奏將來又有論其
自行迴護者矣著將此摺鈔錄交與巡撫雅爾哈善將摺內情形
逐一詳悉查明據實具奏所有百姓千總差往丹陽索銀誑稟之
處亦著質訊奏聞此外如有地方不肖之員造作浮言希圖聳聽
挾私心以撓公務者著一併嚴查究治至摺內稱直督方觀承勞
民妨農辦理地方不甚妥協一節因該督循照從前御史沈廷芳
條奏舊例撥夫歲修良鄉涿州等處大路以便行旅學士世臣奉
差路過誤謂先期平治御道遂以入奏經朕降旨查明將成修停
止止令就低窪殘缺之處隨時酌辦且給工不專民力興作必俟

冬旬辦理見已悉協無可復論奏中更請於明歲回鑾之後差親信大臣清查虧空蓋恐如榮大成臧根嵩之事豈江南州縣皆榮大成臧根嵩之流乎使果有之該督撫亦無不參之理而瑣細周防成何政體此事不可行○諭御史歐堪善參奏梁詩正一摺朕召軍機大臣吏部堂官掌院學士及該御史面加詢問內如高山原係梁詩正房師至帶領引見吏部止據投供人員依次擬缺大學士公傅恆因在軍機處承旨知其見在直隸修城而該司以修城無案可稽部選自遵成例軍機處知其修城本部無由而知因卽帶領引見單內夾片聲明則高山之引見道缺係該堂官公同辦理俱亦同聲共證其不出於梁詩正一人瞻徇師生情分不待辨矣保舉金烈一事亦該堂官公同商辦其不由科甲與例不符會於摺內聲明而梁詩正並將不合例之處先期商之大學士公

傳恆及詢歐堪善以金烈是否另有夤緣梁詩正形迹令其回奏據稱亦無可指此二款雖有師生同鄉之嫌初無曖昧徇私實蹟歐堪善據事上聞其中辦理曲折無由深知已經面爲剖悉足服其心至姚範陳兆崙列入京察一等則姚範人本平常不堪超卓之選前於引見考試人員時令其休致梁詩正謂其人閉戶讀書詞臣中閉戶讀書者不少豈能盡列一等陳兆崙前次京察一等見今究係丁憂並不在京供職卽不入之下等亦不當過於從優此則梁詩正不無徇徇其翰林輪班引見臨期越次更換若不過一二員或因偶爾遺疾亦事之所有若如歐堪善奏摺內所指廖鴻章出科聯又面奏路斯道莊有信湯大紳則已有五員此中不無高下其手著傳廖鴻章等問明更換緣由是否出之梁詩正之意另行降旨交部察議梁詩正協辦閣務專領銓曹其供職內廷

不過筆墨之事初非格外加之寵任若謂其招權納賄植黨濟私則是伊福薄不能承受恩典矣且朕何如主而大臣能恣行其胸臆乎至小小瞻徇情面則不獨梁詩正舉朝大臣恐懼未能盡絕且如張廷玉掌院幾三十年似此攙越更換引見之事不知凡幾何以並無一人參奏然卽有其事亦復何關政治在梁詩正有此一二可議卽被參奏得以知所做省未始非福歐堪善之言當以爲感而不當以爲怨也朕因修省求言今日歐堪善錢琦二人所奏初不切於修省之要務何則假令其言盡實亦應早入告不應待之此日者但伊等各就所見據實直陳尙爲留心職掌不失言官封事之體非援引陳編空言塞責者比著傳諭中外臣工知之○諭我朝創制國書分十二字頭簡而能該用之無所不備而音韻尤得天地之元聲惟是漢人初學清字者辨字審音每借漢字

音註以便記誦而漢字不能悉協不得已更從俗音以意牽合未經校正畫一將恐久而益差閒嘗讀漢字金史其用漢字音註國語者本音幾不可曉諦尋之則原清語所常習又如元史之達魯花赤以今蒙古音譯之當爲達魯噶齊不華當爲補哈此類未易枚舉在史氏或以己意爲音或出於當時承習蓋由以漢字而註清語蒙古語既非本字又無一定是以譌復傳譌以此知官爲校定之不可以已也夫一天也國書謂之阿補喀蒙古謂之騰格哩西番則謂之納穆卡至國書之騰格哩則漢語所謂絃子耳又如一日也國書謂之舜漢文謂之日蒙古謂之納蘭西番謂之尼嗎又如國語呼爾者其音爲西而西方則稱幹呼基此在兼通清漢文者無所疑義而通清不通漢者但知西之爲爾通漢不通清者但知西之爲西而語之以幹呼基且不知爲何物矣蓋凡物之命

名本屬後起爾雅釋名方言土訓莫可殫述皆假象耳若夫以漢字註清文實假象中之假象而必執此以較是非定高下寓褒貶此特私心妄見耳爰命大學士傅恆率同儒臣重定十二字頭音

訓開章六字則用直音如阿額伊鄂烏誇餘用二字合音如

尼難勞雷其餘十一字頭首六字用一字合音如

伊鄂烏誇以下俱用三字合音如衣衣衣衣衣衣以分輕重緩急而國書之

元聲略可得梗槩是不過同文之一端無關奧義然習之於童蒙

之始有不容忽者用示其義傳示久遠俾知所法守焉○命額駙

策凌子吹濟多爾濟在阿哥書房讀書○壬戌諭御史歐堪善所

奏梁詩正一摺昨經召見軍機大臣吏部堂官掌院學士及該御

史而降諭旨虛衷剖悉務得情理之平令該御史中心允服並無

偏向梁詩正之意此諸臣所共知也摺內金烈高山二事係吏部

東華廣錄

堂官公同辦理非由梁詩正一人其京察列爲一等之姚範陳兆
崙則係辦理錯誤姚範已令休致陳兆崙見在丁憂乃因上次京
察原列一等此番仍照前填註亦係向來習套其有無瞻徇止於
輪班引見一事查明是否攬越調換可得實情如果實有私弊則
姚範陳兆崙之列入一等亦爲有意瞻徇今經軍機大臣查詢該
御史所奏本月初十日應帶輪班翰林內路斯道一員本日原已
引見其廖鴻章出科聯莊有信湯大紳則係第一班已經引見之
員所奏調換之蔣元益是日又並未引見是梁詩正並無徇私更
換之處已屬顯然在該御史一聞廖鴻章出科聯之言不及查考
此亦風聞言事之常如必將辦理曲折備細周知然後入告則幾
無可言之事矣梁詩正旣無瞻徇無容察議歐堪善雖得自傳聞
而事屬有因並非誣捏亦無庸置議其廖鴻章出科聯妄以己意

揣度謂其更換引見不無騰其口說歸怨掌院之意其累日之不能安靜守分可知著交部察議近日朕望兩心殷夙夜焦勞側身修省大臣等日經召對自所共信御史爲朝廷耳目凡有見聞原當隨時入告不必待有求言之旨若爲修省進言則如近日所奏豈足以裨補闕失感召天和徒煩朕於乾惕靡甯之中一一詳爲剖示在朕雖無厭怠之心而諸臣亦可謂不知體要矣數日前學士世臣補授盛京兵部侍郎伊曾以豆鄉等處除道妨農一事入奏建言者或疑其因此擢用遂相率紛紛而至由此觀之是仍爲己躁進之念重而愛君憂國之念輕亦不可不知內省也至大臣等招權植黨之事可以信其必無設或有之朕亦豈能姑容如古所稱烹宏羊天乃雨之說此時本無其事若於同鄉師生情面遇事稍爲瞻徇似亦不能盡絕此雖無傷大體然身爲大臣者必當

以秉公持己自勉使人無取可指方不愧精白自矢之節苟其有干物議卽係平日不能深信於人朕故謂此奏雖虛未始非樂詩正之福且凡爲大臣者因此而砥礪衾影倍加自檢則歐堪善之奏亦未必無小補耳若謂濟時要務豈足當之並論中外知朕意焉○乙丑鍾昭因病解任以楊廷璋爲廣西按察使○丁卯以赫赫爲內閣學士

由光祿寺知遷

○戊辰

上詣

黑龍潭祈雨

○庚午諭

國家政事宜從實而不事虛文向來題奏事件有拘於舊套習而不察者如參劾屬員本內必稱正在繕疏聞據兩司道府揭報前來與臣訪聞無異云云蓋由失察屬員例有處分惟聲明揭報可邀免議是以遂成印板通套而不知卽虛誕詐僞之較著者夫屬員劣款有得自督撫訪聞者有出自兩司或該道府州揭報者有督撫訪聞有穢聲交司道府州查訪實蹟者情形原自不同參疏

中據實上聞何所不可若謂一面繕疏一面揭報適相符合或千百中偶有一二安得事事如此則何不明言其訪問所自而必相率而爲僞耶且由此益可見該府及直隸州之稱職與不稱職蓋一府一州屬員雖多而切近相臨耳目難掩且賊私纍纍必非婪取於旬日之閒設令久與共事毫無覺察或屬員多容貪吏而一待督撫訪問交令查察不待問而知該府州之闕茸無能矣更或平日有心徇庇督撫交查尙爲之彌縫掩覆及至勢難挽回始不得已具揭申報在督撫亦必窺見底裏卽當隨本附參不可顧預了事令其脫然事外如使督撫密令查察卽行據實詳查或於訪問之外另得其實在劣蹟是不得謂之徇庇若仍追咎其前此失察之過則爲牧守者不亦難乎夫察吏之道必明是非覈功過以爲舉錯之衡方足以服人心而肅功令嗣後督撫參劾屬員侵

蝕錢糧及因事納賄者其發覺緣由或何人詳揭或自己訪聞或係密交何人查辦據實聲明不得沿襲故套卽如衛哲治所參全椒縣知縣王宗洛各款其滁州直隸州知州朱樞曾否揭報王宗洛婪贓各案是否在伊任內俱應據實查明如該牧莅任未久卽能查出則爲留心察屬之員其前任亦應查明交議一併諭令知之

六月壬申朔 上幸靜宜園閱健銳營兵○甲戌命驅逐多倫諾爾攜眷流民禁蒙古與民人爲婚○丙子諭軍機大臣等額駙策凌爲國家竭誠宣力是以 皇考加恩封至親王授以定邊左副將軍重任額駙謀勇之名準夷莫不懾伏訓兵飭備使喀爾喀甯靜無事實爲國家勲戚重臣不意患病遽逝其定邊左副將軍之任甚屬緊要簡任務在得人伊長子扎薩克和碩親王成衮扎布

前在軍營著有勞績其才具實堪勝任雖左副將軍非世襲之職而因才器使有所不拘著將成袞扎布授爲定邊左副將軍成袞扎布其務矢忠勤效法伊父訓練兵眾安靖地方以副朕任用之意○丁丑調徐以升爲江西按察使黃岳牧爲貴州按察使○己卯命尙書汪由敦查勘永定河漫口○辛巳諭各省鄉試房考本任委員署理著爲令○壬午諭軍機大臣等據駐藏侍郎拉布敦奏稱珠爾默特那木扎勒將恭布等處火藥擄去四十九駄調去兵一千五百名看此情形藏務尙在未定請將更換臣等之處暫行停止等語此奏亦係慎重地方之意但前降旨派出同甯令換拉布敦之後旋即停遣另派副都統班第代之嗣又降旨令紀山來京請訓前赴西甯俟紀山至西甯時班第再行赴藏伊等尙未接奉此旨此旨到時紀山來京由京再至西甯必需數月班第俟

紀山到彼後起身赴藏之時而珠爾默特那木扎勒已回諸事具定矣今若謂珠爾默特那木扎勒有叛逆之意豈有伊於藏內不藉端舉事至他處而始反之理乎此絕無之事也朕意珠爾默特策布登或未必身死耳何則珠爾默特那木扎勒與伊兄不和若生事日久我必發兵大兵至時伊之殘暴畢露恐或將伊順便擒獲故捏報伊兄已經病故見始前往辦理亦或有之不然則因查辦伊兄信用之人調兵以徯其身亦未可定然卽珠爾默特那木扎勒實係往討其兄或往約束阿里克之人俱不足慮但恐珠爾默特策布登未死不能敵伊弟之兵投往準噶爾勾引準噶爾侵犯藏反多可慮果如朕之所慮藏地路遠亦須俟實在事出之時不得已而辦之耳今安可妄舉乎爾等可寄信於傅清拉布敦切勿使珠爾默特那木扎勒生疑辦理一切事務惟期計出萬全勿使

我疑彼而彼知覺致滋事端也今伊等惟將珠爾默特那木扎勒如何行事如何舉動之處詳勘具奏慎勿輕忽至遣人更換拉布敦之旨旣云未曾宣布尙在彼處收貯著暫停止俟珠爾默特那木扎勒回時伊等將一切情形詳查具奏朕另降旨後將此旨宣布拉布敦再行來京○癸未諭前因王等與部院滿洲大臣俱各偷安坐轎竟不騎馬朕曾降旨禁止此特令伊等勤習武藝不至有失滿洲舊規非謂王大臣等不宜坐轎不可坐轎也今聞王大臣內有坐車者坐車與坐轎何異伊等誤會朕旨轉致相激豈朕諄諄垂訓本意嗣後止准王等與滿洲一品大臣等照常坐轎其餘槩令騎馬再都統等不可坐轎業經禁止今坐車行走者有之伊等又有何事又有何等苦差亦求安逸乎都統既有訓導官兵之責理宜習勤表率豈可偷安此次訓飭之後儻都統與部院二

品以下堂官等再有坐車者御史等指名參奏朕必將違禁之人治罪斷不輕貸○癸巳命宗室王公房支承襲准追封三代不必予諡曾經革退者不准追封○乙未申諭領侍衛內大臣等訓練兵丁

東華續錄

乾隆三十二

臣王先謙敬編

臣周潤蕃恭校

秋七月丙午諭兩廣總督陳大受奏稱調任總督碩色巡撫岳濬前在廣東任內徇庇糧驛道明福婪入多贓並不糾參且於上年計典濫膺卓薦岳濬辦理萬年吉地柎木修築海陽縣隄工二案一任屬員弊混等語碩色素性柔懦諸事含糊於屬員劣蹟一無覺察殊屬徇縱著俟此案審定之日交部嚴加議處岳濬受朕深恩屢由廢員復加擢用伊父見蒙格外殊榮岳濬理宜感激圖報乃一味優柔姑息以取悅屬員與碩色各懷意見時相牴牾且於糧驛道明福之婪入多贓曲意瞻徇吉木隄工二案均係巡撫衙門專政並不留心查辦深負恩典岳濬著革職來京候旨以爲

徇庇屬員者之戒前經降旨調任之雲南巡撫圖爾炳阿來京另
用之安徽巡撫衛哲治俱著仍留原任○易州水命尙書海望撫
恤災民加賞修葺房屋銀兩○丁未命南河總督高斌堵築宿遷
等處漫口○己酉諭軍機大臣等廣東省糧道衙門向來積弊甚
多乾隆六年業經降旨通行禁革今該督陳大受參奏丁憂糧驛
道明福在任折收米一萬九千餘石價銀二萬七千餘兩訊據供
歷任俱如此折收此在乾隆六年以前尙可謂之相沿積弊乃在
禁革以後仍有此等陽奉陰違之事如法紀何糧道折收作弊斷
不能掩督撫之耳目策楞曾任廣東總督準泰曾任廣東巡撫著
將六年以後歷任糧道有無浮收米石存倉向各府州縣折價焚
收入已及始於何年何員任內暗行舞弊嗣後遂公行折價之處
據實指明具奏見經該督陳大受巡撫蘇昌參出並差尙書劉統

勦前往徹底清查自必水落石出該督撫不得瞻徇舊屬自蹈欺罔之咎○辛亥諭據湖廣總督永興奏稱查訊朱荃落水一案據宜昌府知府阿爾布安陸府同知黃修忠等研訊朱荃家人趙成供出朱荃上年十月在邛接到家信當卽焚毀又於十一月十六日家人朱二持訃到署朱荃亦不令聲張歷考嘉定等三郡一州賄賣生童九名典史李榮秀及宜賓縣高知縣范教官等過付朱荃焚得銀兩及肉桂三斤又出京時道出山西蒲州府知府李爲棟係四川巴縣人餽送朱荃銀兩貂套等物按試時將李姓童生二人並取入學等語朱荃匿喪情節並賄賣生童供證確鑿殊堪髮指朱荃雖稱落水自戕所有查出賄買生童及伊弟家人等俱不得縱之漏網著將永興原摺鈔發見在湖廣之家人等並伊弟朱華朱英俱解交四川總督策楞嚴審定擬具奏其告病之蒲州

府知府李爲棟如未回籍卽著山西巡撫阿里衮就近審明具奏
○召劉方藹來京以德文爲湖北按察使○己未飭八旗官員習
射○庚申諭朱荃在四川學政任內匿喪趕考賄賣生童並勒索
新生規禮贓私鬻鬻已據四川湖廣浙江各督撫等研訊伊弟及
家人等供據確鑿實近年來學政所未有伊乃大學士張廷玉兒
女親家其敢於如此狼藉婪贓明係倚恃張廷玉爲之庇護且查
朱荃爲大逆呂留良嚴鴻逵案內之人幸邀寬典復貪緣薦舉冒
玷清華本屬衣冠敗類大學士張廷玉以 兩朝元老嚴鴻逵之
案繕寫 諭旨皆出其手豈不知其人乃公然與爲姻親是誠何
心設在雍正年間伊必不敢如此卽在伊平日謹守遠禍之道亦
不當出此而漫無忌憚至於如此其忘 皇考聖恩爲何如其藐
視朕躬爲何如張廷玉若尙在任必將伊革去大學士交刑部嚴

審治罪今既經准其回籍著交兩江總督黃廷桂於司道大員內
派員前往傳旨詢問令其速行明白回奏再降諭旨張廷玉深負
三朝眷注之恩卽其不得行私而欲歸之一念卽已得罪天地
鬼神朕尙欲全其晚節今乃種種敗露豈容冒叨寵賚所有歷來
承受 恩賜 御筆畫籍及尋常賞賚物件俱著追繳至儲麟趾
參奏朱荃交部嚴察議奏時朕曾以其事問梁詩正伊並不將朱
荃之事詳悉陳奏觀其詞色轉若儲麟趾不應參劾者且有功令
森嚴無人更敢作弊之語見在朱荃明福作弊至於如此何謂無
敢作弊其意豈欲朕信臣下之無敢作弊遂不加覺察可以自便
己私耶及部議時若非朕洞鑒情節飭令大學士傅恆詳悉查辦
一任梁詩正等蒙混則儲麟趾可以誣參議處矣部中定議彼此
議論堂司官皆所共聞令梁詩正撫心自問尙不足以服其心耶

梁詩正著交部察議朱荃平日爲人及匿喪納賄諸罪狀與夫張廷玉以國家舊大臣而與叛案中有名人結親之處漢大臣御史中甯不知之而張廷玉在任時無一人參奏者足見朋比瞻顧之習終不悛改儲麟趾尙能據實參其匿喪一事較之挾詐行私及撫拾浮言者爲稱職矣儲麟趾著交部議敘朱荃在詞林中嘗考列一等或係張廷玉閱卷或派大臣同閱若非張廷玉授意屬託則閱卷大臣揣摩迎合且京察大典張廷玉列朱荃於一等朕於引見時降爲二等至保舉試差人員汪由敦力保朱荃明係瞻徇朕於引見冊內記其人終不妥近曾以示汪由敦可見營私交結伎倆在朕前自不能掩此等師生朋比之習不可不嚴加懲創汪由敦著交部嚴察議奏尋吏部議上得旨梁詩正著革職從寬留任汪由敦本應革職但念其人尙勤慎學問亦優著在兵部侍郎

任內效力贖罪刑部尚書著劉統勳補授工部尚書著孫嘉淦補授儲麟趾著紀錄二次餘依議○甲子諭前經降旨張廷玉所受

恩賜物件俱著追繳是以令內務府總管德保前往伊在京賜第內查看原令將賞賜物件及官房收回乃併將伊家私有之物槩行查辦殊屬錯誤著將御賜物件收回此外查過物件俱著給還伊家至護國寺並蠶池口住房俱屬恩賜官房但蠶池口住房係聖祖仁皇帝賜伊父原任大學士張英者仍加恩聽伊子孫居住其護國寺恩賜官房自應收回著將此房賞給大學士史貽直居住其查出見存一萬五千餘銀著交貯內務府庫內伊有應代朱荃賠交贖罪官項著於數內扣抵○禮部議覆雲南巡撫圖爾炳阿奏稱緬甸初次奉表稱臣納貢應准其來京從之○丁卯清河漫口合龍○戊辰諭恂郡王叔年老著賜金黃色

紗蟒袍並許嗣後卽服用金黃色○己巳截留漕糧二萬石於天津備賑

八月壬申冊立 皇貴妃那拉氏爲 皇后○癸酉加上 皇太

后徽號曰 崇慶慈宣康惠敦和皇太后○乙亥吏部題前任府

尹霍備失察屬員賊根嵩虧空應行追賠得旨此本內所議賊根嵩名下應追虧空銀兩經該署撫查明原籍委無產業照例取結保題應著落失察之前任府尹霍備追賠還項等語向來州縣虧空本犯無力完帑將徇隱之革職知府勒限賠補至限滿不能全完例止革職別無治罪之條夫以已經革職之員復議革職不過照例註冊虛文從事耳此等劣員在任時旣已通同徇隱代賠時又可任意延挨帑項虛懸刑章倖免凡查察之不嚴代賠之不力未必非此例有以啓之也卽如霍備本身應賠銀兩尙不能完又

何能代賠藏根嵩侵項該部亦明知霍備力不能完徒以照例辦理完結部臣託之空言而請之朕亦明知託之空言而允之上下相蒙成何政體朕一惟務實不尙虛文侵貪之弊尤不可不急爲整飭嗣後侵虧案內應代賠之知府限滿不完作何分別治罪之處該部另定議具奏霍備代賠藏根嵩侵虧之案卽照新例治罪此本著發還尋議嗣後除知府失察屬員虧空及本犯實係因公那移者仍照原例辦理外其知府通同徇隱州縣侵欺倉庫錢糧著落代賠之項若已滿三限尙不賠完經該督撫將革職代賠之知府取具家產全無印甘各結保題到日臣部按其已未完交分數治罪以十分爲率如未完之數在五分以上者杖一百至六分者杖六十徒一年七分者杖七十徒一年半八分者杖八十徒二年九分者杖九十徒二年半十分無完者杖一百徒三年均不准

納贖再查州縣侵欺帑項限滿不完既著徇隱之知府賠補則著賠之日卽應將知府之原籍房產令地方官查記檔案申報上司如能依限代賠全完房產給還仍照例准其分別開復降調如三限已滿變抵房產仍不足數卽照新定條例治罪從之○命張泰開提督順天學政以呂熾爲禮部侍郎○丙戌追封 皇后父訥爾布爲一等公以其孫納蘇肯襲一等侯○丁亥 上奉 皇太后率 皇后謁 陵並巡幸嵩洛啓鑾○庚寅 上奉 皇太后直隸地方本年額賦十分之三歉收地方十分之五○甲午諭協辦大學士阿克敦應否給俸互相推諉一案經兵部奏明交都察院議處各部堂司官都察院於今日始行陳奏且僅議處吏部將戶兵二部另請交吏部察議甚屬紕繆此案於六月中旬交議何

難按限辦理朕早卽聞都察院於議處此案遲回觀望礙難辦理卽云議處戶兵二部爲吏部之事則定案之時何不會彙乃故爲紆回遲緩以待頒詔之後遽恩援免在此事甚小若平時辦理決不至如此遲延蓋因大學士傅恆管理部務是以都察院徘徊觀望有心延閣此所謂非曰愛之其實害之試問傅恆敢當此乎馬靈阿係傅恆所保之人卽他人如此尙應思及曾經薦舉應避嫌私迎合之嫌而乃隨聲附和及至朕面問此事又不能詳陳始末倨侮朕前甚屬不恭馬靈阿原係郎中朕因傅恆保薦特命署理侍郎理宜奮勉效力乃旅進旅退侍郎任內並未實心陳奏一摺辦理一事朕因其不能勝任令以三品京堂降補及副都御史缺出復加恩擢用伊竟全不知感察其詞色時懷怨望今日教責之下仍悻悻不知悔懼滿洲世奴至於如此朕甚憤懣亦豈堪之伊

所恃者誰耶情甚可惡業將伊革職發粘竿上效力贖罪至彭維新係屢經獲罪廢斥之員朕復用爲左都御史苟有人心自應痛自改悔以贖前愆今自任事以來全無振作之氣辦理此案復一味隨眾瞻徇深負朕恩著仍革職其都察院堂官著一併交部嚴加議處所有吏戶兵三部堂司官著都察院會同吏部另議具奏其處分之處司官仍著援例寬免堂官俱不准援例寬免尋議奏德通積德陳惠華葉一棟均應革職查德通陳惠華俱係革職留任之員應革任得旨德通不能勝左都御史之任且兩經議革未便姑留著以三品京堂降補俟伊得缺之日其兩次議革之案仍著帶於新任積德著革職從寬留任陳惠華從寬免其革任仍著註冊葉一棟見有失察家人之案另行交部嚴加議處此案卽著照部議革職○乙未 上駐蹕南苑行圍

九月庚子朔諭都察院左都御史員缺著梅穀成補授楊錫紱丁憂在籍將及服滿著補授刑部侍郎令其於服闋之日卽來京供職伊未到任之前刑部侍郎事務著嵇璜暫行兼管○壬寅上奉 皇太后率 皇后謁 泰陵○甲辰以廣成爲左副都御史

由大理寺卿遷

○丙午諭吏部議處原任大學士張廷玉明白回奏一案

請將張廷玉革去職銜交與刑部定擬以爲負恩玩法者戒張廷玉身受 三朝厚恩罕有倫比且膺配享 太廟之曠典宜何如感激報效以盡匪懈之誼卽年已衰憊亦當依戀闕廷鞠躬盡瘁不忍言去乃伊平時則容默保位及其旣耄不得復行己私但思歸榮鄉里於君臣大義遂愬然置之不問以如此存心不惟得罪於朕並得罪於 皇考是以天地鬼神顯奪其魄俾一生居心行事至此盡行敗露情罪實屬重大卽褫其官爵加以嚴譴亦不爲

過至黨援門生及與呂留良案內之朱荃聯爲兒女姻親之罪在伊反爲其小焉者矣既經罰鍰且令追繳 恩賜物件已足示懲若又如該部所議革職治罪在張廷玉忍於負朕自所應得而朕心仍有所不忍著從寬免其革職治罪以示朕始終矜宥之意○駐藏都統傅清侍郎拉布敦奏珠爾默特那木扎勒往後藏時將噶布倫第巴布隆贊等誣搆抄沒分給親愛之人又將珠爾默特策布登之子珠爾默特旺扎勒逐出凡頗羅廬所用舊人殺害抄沒黜革者甚多臣等遣人往後藏問候班禪額爾德尼回稱訪聞珠爾默特策布登病故後其子朋蘇克旺布或云逃去或云在阿里克地方至珠爾默特旺扎勒係奉旨交與珠爾默特那木扎勒養育之人今在扎什倫布爲喇嘛珠爾默特那木扎勒見帶兵三千餘名在前藏後三百餘里達木地方遊牧得旨此皆珠爾默特

那木扎勒乖張悖戾但道路遼遠可暫聽之如果關繫者大再行
籌畫○己酉 上駐蹕正定府北門外閱兵○辛亥以拉布敦爲

左都御史○乙卯賞直隸河南辦差銀二萬兩各營汛兵丁加賞

兩月餉銀○丙辰免河南經過地方額賦十分之三○裁甘肅甯

夏道屬土鹽稅廠○丁巳 上駐蹕彰德府謁 文廟幸精忠廟

○庚申調納穆扎爾爲工部侍郎以德保爲戶部侍郎

由內務府總管還

○辛酉 上駐蹕百泉奉 皇太后幸白露園○以祭飧爲貴州

按察使

由直隸通永道還

○壬戌諭河南軍流以下罪減等發落○準噶

爾宰桑薩喇爾率屬來降先是沙喇克來降時稱策旺多爾濟那

木扎勒昏暴不理政事其姊烏蘭巴雅爾代管諸務又爲策旺多

爾濟那木扎勒所疑送往回地羈禁及敦多克等來降稱策旺多

爾濟那木扎勒自知兇暴淫亂懼眾人謀害可代伊立爲台吉者

惟喇嘛達爾扎一人欲託言至沙喇擊勒行圍將喇嘛達爾扎謀害有台吉賽音伯勒克與爲首宰桑厄爾錐音袞布鄂勒吹鄂羅什瑚巴哈曼集那木扎多爾濟博和爾岱商謀乘策旺多爾濟那木扎勒行圍卽將伊擒住立喇嘛達爾扎爲台吉經小策零敦多卜之子達什達瓦密告其謀策旺多爾濟那木扎勒將厄爾錐音擊獲袞布等聞知領兵奪回厄爾錐音復將策旺多爾濟那木扎勒擒住瞞其兩目並達什達瓦俱送往阿克蘇囚禁遂立喇嘛達爾扎爲台吉等語至是薩喇爾來降告稱策旺多爾濟那木扎勒疑忌其姊夫賽音伯勒克賽音伯勒克遂與宰桑厄爾錐音等同謀將策旺多爾濟那木扎勒殺害立其喇嘛達爾扎因我台吉達什達瓦爲策旺多爾濟那木扎勒所信任亦遂擒拏又拘喚大策零敦多卜之孫達瓦齊不肯前往喇嘛達爾扎以其人眾地險亦

未敢相迫至我台吉被拏後又欲將我等戶口分賞各宰桑是以我等來降軍機大臣奏入命安插於察哈爾尋授薩喇爾爲散秩大臣○癸亥諭據四川總督策楞奏稱署布政使宋厚蒼滑性成牢不可破膽徇之事不一而足見在具疏題參等語四川布政使員缺著齊格署理四川按察使員缺著鄂敏補授○再免河南歉收地方額賦十分之五○甲子以胡寶瑋爲左副都御史由宗人府丞遷○丙寅 上奉 皇太后率 皇后渡河○戊辰孫灝緣事革職調張若震爲湖南布政使以楊應琚爲甘肅布政使蔣嘉年爲甘肅按察使由江西廣饒道遷○己巳免河南祥符等二縣明年額賦○永定河漫口合龍

冬十月庚午朔 上幸嵩陽書院○辛未 上詣 中嶽廟致祭

○上登嵩山○癸酉 上奉 皇太后率 皇后回鑾○丙子

上奉

皇太后駐蹕開封府○諭朕省方觀岳周覽民情河南

九

地宅土中素稱淳樸今值雨暘協應禾稼告登巡行之次親見童叟歡欣室廬甯輯朕懷深爲欣慰撫臣藩臬以至郡守牧令應仰體朕心力行善政小民亦當崇儉去奢力田孝悌以期共享昇平之福○丁丑 上閱兵○飭索倫兵丁勤習弓箭毋改學鳥槍○諭軍機大臣等據傅清拉布敦等奏稱珠爾默特那木扎勒見在調兵防阻有謀爲不軌之意應俟珠爾默特那木扎勒由打克薩地方回來接見之時卽爲擒拏翦除此孽等語傅清拉布敦所見甚屬冒險珠爾默特那木扎勒本非善類朕當時久已料及因其機變未萌止可靜以待動若如伊等所奏果能卽時擒戮以絕後患豈非國家之慶但伊二人孤懸在藏或能潛致其屬下之人使爲我用猶可成事否則輕率舉動必致釀成大事然伊等已奏明

不待請旨卽行乘機辦理朕雖降旨令其不可妄動而道途遙遠難以豫定若珠爾默特那木扎勒尙在打克薩未回伊等先接此旨自可從容審度時勢酌量辦理或此旨到時其事已行萬一不能翦滅勢不得不爲用兵之計可將此摺鈔寄策楞岳鍾琪等令二人詳悉閱看或差妥當可信之人密爲偵信一面豫籌徵調川兵以爲防勦之計必應先爲準備無致臨事倉卒然須加意慎密妥協辦理不可稍有洩漏致珠爾默特那木扎勒驚疑竊發轉啓弊端也著速行傳諭知之○戊寅 上幸古吹臺○加河南巡撫鄂容安內大臣銜○己卯諭據巡撫鄂容安奏稱恭遇駕幸河南通省紳民感沐皇仁無由仰報情願捐輸共收銀五十八萬七千餘兩以充公用等語朕時巡方岳一應道路橋梁等費皆准開銷正項從無絲毫累民之事卽城垣祠廟有應勘墾灑埽略爲整葺

省止宜動支帑項卽其間或有開銷不到之處賞給該省公項銀兩以資通融辦理之用曾何藉於輸將鄂容安此奏甚屬錯誤因其據實陳明尙不至蹈欺隱之咎猶可稍寬但朕省方問俗勤恤民隱尙慮休助之弗周豈容供用轉資於下鄂容安不能仰副朕意殊失政體著傳旨嚴行申飭所有紳民樂輸之項俱著給還○甲申諭據雲貴總督碩色參奏巡撫圖爾炳阿於永善縣知縣楊茂虧空一案與布政使官爾勸知府金文宗通同舞弊代爲彌補等語楊茂虧空銀數至七千餘兩之多而以欵差曠日遲久需用甚多爲辭在舒赫德等奉差閱兵路經數省所過不止一縣俱不聞另有供應何獨永善縣用至七千餘兩此理之所難信亦事之所必無卽如從前奉天臧根嵩等侵盜錢糧盈千累萬俱云辦差需費及朕特差大臣前往查審則實係侵盜毫無冤抑卽本犯亦

俯首無辭可知侵貪之吏借名推卸乃其常技楊茂之託言欽差需費亦復如是該上司既不能覺察於平時及其敗露自應卽行嚴參究追乃知府則代請彌補藩司卽擅動官項上下扶同徇私舞弊實出意外非重懲不足以儆圖爾炳阿身爲巡撫竟行批結其欺隱徇庇罪實難追圖爾炳阿著革職擊交刑部治罪宮爾勸金文宗俱著革職交該督撫嚴審定擬具奏○調愛必達爲雲南巡撫開泰爲貴州巡撫以楊錫紱爲湖南巡撫調秦蕙田爲刑部侍郎田懋爲禮部侍郎以歸宣光爲吏部侍郎

由內閣學士遷

○調彭

家屏爲雲南布政使以王興吾爲江西布政使

原任河南布政使

○乙酉

調嚴有禧爲貴州按察使蔡炳爲河南按察使○丙戌諭工部議覆盛京工部侍郎卞塔海題請添蓋收貯樂器等物房屋一案原題內所建房屋僅止四間何至估需工料一千餘兩該部理應指

駁乃朦朧覈准竟似未經寓目者該堂官等於此等明白易曉之事尙如此草率其全不留心任事卽此可見著將該堂官交部議處卞塔海並不據實估報任意浮開尤屬不合著交部嚴加議處此本著擲還另行覈議具奏○命暫開奉天海運○辛卯諭軍機大臣等前據傅清拉布敦等奏珠爾默特那木扎勒有謀爲不軌之意欲俟其由打克薩回來接見時擒拏翦除等語朕已令班第卽速前往令其會同傅清等相機辦理復傳諭策楞岳鍾琪先爲準備今復據傅清等奏到珠爾默特那木扎勒將策凌旺扎勒調去並將班第達家產抄沒其跳梁之狀日益顯著伊等仍欲誘致照前奏辦理此事看來勢不容已自應擒獲明正其罪已傳諭班第謹密詳慎乘機行事可將傳與班第諭旨並傅清等所奏之摺鈔錄寄策楞岳鍾琪閱看其應密行彼此照會及將來或有發兵

應調之處一切俱宜悉心籌辦而不可稍露風聲再近來藏中信息如何一有所聞卽速具奏○戊戌貨黑龍江呼蘭口七家雅拉城災民口糧

十一月辛丑禮部議覆湖廣總督永興奏本年湖北官字號生監止十六名取中舉人四名副榜一名較民卷過優可否將各省官生按照人數多寡酌定取中再吏禮二部司員子弟均列官生亦屬太優請將吏禮二部郎中子弟方准編入官號等語查官卷人數多寡難以懸定請仍照舊例行其數少省分如無佳文庸缺無濫至吏禮二部司員子弟編入官卷非以示優蓋以除弊該督所請均無庸議得旨禮部議覆永興條奏官生過優一本請仍照舊例遵行甚屬偏私各省官生文庸倖中者不堪屈指數何國宗之子同中一科卽其驗也永興奏到朕交部議時卽已知該部必將

指較今果不出所料雖該部議令此後務遵定例官卷數少省分
必文理精通方准取中否則甯缺無濫等語不知從前何嘗無此
例而各省試官狼狽相顧何嘗實力遵照況如各部司員同一辦
事何獨吏禮二部得編官卷此例實不公當該部自應準理持正
立議乃先懷私意轉云非以示優蓋以除弊此其巧於迴護尤屬
紕繆該部堂官著交部察議此本發還另議尋奏官生取中舊例
實屬太優請嗣後直省額中舉人二十五名內許中官卷一名如
無佳文甯缺無濫仍以民卷取足零數不足二十五名者不准錄
取至中小等省雖應額中官卷一二名而或文不足錄全以民卷
補足如磨勘時所取官卷較民卷優劣懸殊者題參嚴議至吏禮
二部員外郎主事固與各部相同卽郎中亦屬無異其應試子弟
應請均毋庸編入官卷並乾隆九年臣部奏准將內閣侍讀子弟

照吏禮二部司員編入官號例亦停從之○壬寅 上奉 皇太

后率 皇后還京師○癸卯恭送 列聖御容 五朝實錄尊藏

盛京○甲辰諭前因田懋性情浮躁執袴之習未除是以令其解

侍郎之任回籍讀書聞其在籍頗屬安靜仍復加恩召用乃伊於

來京召對時即誣奏阿里袞修理太行山道一事詢之阿里袞及

嚮導等全屬子虛轉詰田懋亦無辭以對其在吏部並無感恩出

力之處近因禮部侍郎缺出將伊調補又以不由科甲出身於例

不合令其候缺補用此時既未得缺則係候補之員不應仍居九

卿之列乃伊覲然與見任九卿同班且有怏怏之意御史又參其

僕從鬪毆不法是田懋舊習全未悛改仍著回籍讀書○乙巳命

河南山東截留明年漕糧十萬石於直隸備賑○丁未和親王弘

晝等奏 天壇有請神亭十座 祈穀壇有請神亭六座惟 地

壇內係執事官捧請請添造請神亭十座用明黃素段成造又

皇祇室正位供案較

配位供案高一寸惟

皇乾殿正位供案

較

配位供案高一尺請加高九寸成造又

三壇所陳孔桌未

能畫一請

正位俱改設一孔桌一張

東配位俱改設三孔桌

一張

西配位俱改設二孔桌一張又供奉器具及祿套等項向

來顏色閒雜請將

天壇

祈穀壇陳設一應祭器俱用天青色

成造

地壇陳設一應祭器俱用明黃色成造其餘一切零星器

具俱分別等差修飾見新報聞○轉呂熾爲禮部左侍郎以陳邦

彥爲禮部右侍郎

由內閣學士遷

○戊申諭德保於內務府查辦餘地一

事有聽從司員干請情節本應革職治罪但念其平日尙屬勤勉

且實無贓據從寬革去戶部侍郎副都統內務府總管著以乾清

門二等侍衛照舊管理圓明園等處效力贖罪○己酉調兆惠爲

戶部侍郎書山爲刑部侍郎以鶴年爲倉場侍郎

由內閣學士遷

○辛亥

飭奉天毋禁陸路商販○癸丑策楞岳鍾琪奏先據西藏糧務通判常明稟稱珠爾默特那木扎勒告其屬下有我已設計撤回漢兵四百餘名其餘若不知機早回必盡行誅滅等語又拉里糧務州同董恭稟稱珠爾默特那木扎勒行令沿途漢土兵民及文書俱不許往來出入等語茲據駐藏外委王廷斌等稟稱珠爾默特那木扎勒潛謀不軌駐藏傳拉二大人於十月十三日誘至通司岡衙門接見遂將伊誅戮詎逆黨卓呢羅卜藏扎什等聞信卽率眾數千圍署施放槍礮周圍放火達賴喇嘛遣眾僧救護不能得入拉大人被亂刀砍害傳大人身被槍傷立即自盡所有文武官各被難糧務衙門被劫庫銀八萬五千餘兩十四日卓呢羅卜藏扎什帶兵潛逃十五日達賴喇嘛始令珠爾默特那木扎勒之妹

夫公班第達暫理藏王事務附近喇嘛番眾等俱已歸順逃難兵民達賴喇嘛見在養活等語隨又據管領臺站游擊殷瑞稟稱十月十八等日達賴喇嘛傳令各塘照舊應付官兵並探知達賴喇嘛傳令各番不得傷害漢人等語又據常明稟稱十月二十三等日據公班第達稱逆賊已獲過半餘亦不難擒拏餉銀見在查追已得二萬餘兩四面緊要路口亦派人把守等語又據臺站官遞到達賴喇嘛公班第達奏摺二函臣等看此情形殊爾默特那木扎勒伏誅已屬確實其逆黨亦據達賴喇嘛公班第達次第查拘但卓呢羅卜藏扎什等敢率眾傷害大臣不法已極應卽進兵擒戮且恐餘孽未盡日後又將滋事臣等酌議臣岳鍾琪馳赴打箭爐先於提標建昌鎮調兵三千名出口再於次近調兵二千飭建昌鎮總兵董芳繼後臣策楞再帶兵三千赴打箭爐彈壓相機分

別進勦應援見差幹員沿途曉諭番民並將進兵擒拏逆犯緣由寄知達賴喇嘛公班第達以安藏眾之心再副都統班第見由青海赴藏止帶兵役二十名達賴喇嘛等或未知赴藏緣由臣等一併寄知達賴喇嘛等令遣人接護報聞○甲寅諭駐藏都統傅清左都御史拉布敦前因珠爾默特那木扎勒潛謀不軌情迹顯著奏請相機翦除兇逆朕以伊等孤懸藏地未可輕舉並令俟班第到彼察看情形降旨辦理乃傅清等未及奉到諭旨以機有可乘遂爾便宜行事其逆渠已經授首而傅清拉布敦旋爲逆黨所害爲國捐軀深用憫惜除另頒旨加恩優卹外其隨二人捐軀弁兵著策楞岳鍾琪查明照陣亡例優卹目今藏地見雖撫輯甯謐但善後事宜不可不專遣大臣前往辦理著四川總督策楞提督岳鍾琪統領官兵赴藏綏輯地方按除逆黨總兵董芳隨後統兵策

應尹繼善著就近馳驛前往四川料理一應糧餉軍機侍郎納穆扎爾著賞銀一千兩整裝卽馳驛前往與班第一同駐藏該部卽遵諭速行○諭軍機大臣等珠爾默特那木扎勒之事前經傅清拉布敦奏到朕卽慮其所辦大險不可輕發乃傅清等未及奉到諭旨卽已便宜行事至於身被戕害爲國捐軀情殊可憫除另頒旨加恩優卹外其隨二人捐軀弁兵著策楞岳鍾琪查明照陣亡例交部優卹卓呢羅卜藏扎什黨逆之罪實不容誅著傳諭策楞岳鍾琪統領官兵前赴西藏總兵董芳統兵隨後策應聽策楞等調遣一而安輯藏地一面接勦逆黨務盡擒獲並珠爾默特那木扎勒之子俱應明正典刑以洩公憤而彰國法其媳仍送青海交與其母與彼無涉也又據策楞奏稱派兵八千名以備進剿今觀藏中大局已定不過擒拏餘黨可令策楞岳鍾琪帶兵三千名卽

行速往蘆芳統兵二千名隨後策應其餘三千名豫備派撥應援
可以不必起程若至彼覺兵勢少單卽一面調往一面奏聞再策
楞岳鍾琪進藏務當嚴密防範至西藏地方雖據達賴喇嘛奏稱
已經安撫甯靜但經此番舉動人情必至張皇見在藏地情形若
何速行馳奏卓呢羅卜藏扎什逆釁已成恐其勢不能已益致擾
動策楞等俱應豫爲籌及再行打箭爐一帶口內口外各番向係
西藏所屬亦不無驚駭應明白曉諭以珠爾默特那木扎勒潛謀
不軌前經駐藏大臣據實奏聞朕令班第至彼再會同在藏大臣
降旨辦理乃駐藏大臣等因其形蹟顯著未候旨到卽已便宜行
事雖罪人已經投首而駐藏大臣亦不幸爲逆黨所害所當興師
問罪惟務拔除逆黨以安地方凡非親信逆黨一無株及被難民
番優加卹賞至圯汎番人將官兵捆縛本應治罪但係聽從珠爾

默特那木扎勒所使悉置不問並將此傳知達賴喇嘛令其宣諭
遠近安眾人之心至班第達不能救護駐藏大臣念其勢原孤弱
尙屬無過然亦無功可錄但不附逆黨尙知尊向天朝俟徐加賞
賜策楞岳鍾琪至藏可以此意告知以安彼心而用其力若如達
賴喇嘛所奏卽將班第達立爲藏王將來又成一頗羅鼐日後伊
子又思世襲專據其地轉滋事端前經傳諭班第以藏地應多立
頭人分殺其勢正當乘此機會通盤籌畫務徹始徹終爲萬全之
計所諭班第之旨伊必帶往策楞岳鍾琪到彼詳悉閱看斟酌辦
理事定後應留駐官兵若干名交駐藏大臣統轄以資彈壓並照
舊添設臺站一切善後事宜策楞等隨宜調度詳悉逐一奏聞已
令尹繼善前往料理一應糧餉軍機俱令其籌辦策應並諭策楞
等知之○乙卯諭從前西藏之頗羅鼐甚爲實心恭順且料理藏

中事務一切安帖

皇考世宗憲皇帝屢次加恩由台吉封爲貝

勒伊實感激我朝厚恩彌益恪誠朕卽位以後旋卽封爲郡王後因頗羅鼐年力就衰朕念及將來詢伊二子之中孰堪爲嗣據奏稱長子人輒弱又已出家次子珠爾默特那木扎勒人尙強幹能勝彈壓因是令其承襲迨伊奏事一二次以後朕於其詞意之間卽知其非伊父居心可比日後必生事端諭駐藏大臣留心體察嗣伊摺奏請撤駐藏官兵朕以兵數原屬無多若不准其所請轉啓疑忌之心是以卽依所請行著紀山前往駐紮詎紀山與之設誓和好卽奏事常與同列銜名朕深責其非體是紀山不但不能懾服其心更已墮其術中矣傳清前經駐藏爲伊等所敬服遂令前往更換且慮其勢孤益以拉布敦協同駐藏乃珠爾默特那木扎勒心益狡悖將伊長兄珠爾默特策布登圖害翻以伊兄叛逆

誣奏又伊與達賴喇嘛素有仇讐既戕其兄遂欲計畫藏中不順
 伊之班第達等其勢將延及達賴喇嘛獨居其地雄長一方近遂
 將塘汛文書禁絕不通悖逆情形漸益昭著傳清拉布敦稔知其
 奸摺請便宜從事以絕後患於今年十月初八日奏到朕以僅二
 大臣孤懸絕域未可輕舉即使便宜辦事亦於國體有關且非萬
 全之道批令俟班第更換拉布敦到藏時會同達賴喇嘛及藏中
 大格隆等明正其罪以申國法庶協天朝體制乃傳清等未及接
 到諭旨即於十月十三日傳珠爾默特那木扎勒到通司岡加以
 誅戮而傳清拉布敦旋爲伊屬下卓呢羅卜藏扎什所害總督策
 楞奏到朕深爲憫惻不覺涕零因思傳清拉布敦若靜候諭旨遵
 行或不至是但珠爾默特那木扎勒反形已露儻不先加誅戮傳
 清等亦必遭其荼毒則傳清拉布敦之先幾籌畫殲厥渠魁實屬

可嘉非如霍光之誘致樓蘭而斬之也夫臨陣捐軀雖奮不顧身然尚迫以勢所不得不然如傅清拉布敦揆機審勢決計定謀其心較苦而其功爲尤大以如此實心爲國之大臣不保其令終安得不倍加軫悼耶傅清拉布敦著加恩追贈爲一等伯著入賢良祠昭忠祠春秋致祭傅清並入伊家祠從祀伊等子孫給與一等子爵世襲罔替以示朕褒忠錄庸之至意並將伊二人爲國捐軀之大節明白宣示使天下共知其不得已之苦心否則好事喜功者借此二人爲白寶而事外無知之人又有議其擅開邊釁而仍邀國家如此厚恩者朕豈肯令是非倒置若此哉見據達賴喇嘛奏請立班第達爲郡王亦以藏眾不可一日無人統率爲此權宜之計若如所請則數年之後未能保其不滋事端朕意欲做眾建而分其勢之意另爲籌畫措置雖見在已著策楞等領兵接討逆

黨將來藏地仍留駐官兵塘汛文書往來關繫緊要並格隆事務均應歸駐藏大臣管理呼應方靈其打箭爐地方亦應添駐兵丁以壯聲援一應善後事宜應如何辦理之處著議政大臣履親王莊親王恂郡王及滿漢大學士尙書會同軍機大臣定議具奏前往更換駐藏侍郎納穆扎爾亦著入議夫開邊蹟武朕所不爲而祖宗所有疆宇不敢少虧尺寸此番辦理實事勢轉關一大機會不得不詳慎籌畫動出萬全以爲邊圉久遠之計將此並諭中外知之○封傅清子明仁拉布敦子根敦爲一等子世襲罔替○命侍郎兆惠赴藏偕策楞辦理善後事宜○丙辰諭侍郎兆惠見有出差辦理事件舒赫德仍著在軍機處行走○諭軍機大臣等西藏經此番舉動正措置轉關一大機會若辦理得當則可保永遠甯謐如其稍有滲漏則數十年後又滋事端朕前傳諭班第以

西藏事必富眾建而分其勢目今乘此兵威易於辦理惟在相度機勢計慮久遠方爲萬全傅清等雖曾許班第達爲藏王然伊等辦理珠爾默特那木扎勒之初不知班第達曾經與聞否設令與聞必先有成約如伊果能統所屬人眾救護策應則卓呢羅卜藏扎什未必猖獗至此乃伊不行救護而先奔至達賴喇嘛處其意以傅清等能誅珠爾默特那木扎勒固爲伊除一大患更可得藏王爲利甚大即使不成而彼悠然事外毫無痕迹是賣天朝大臣而坐收鷸蚌之利其居心狡獪爲何如者伊若一爲藏王即使恭順如頗羅鼐而其子孫亦不可保此其可慮豈在珠爾默特那木扎勒下哉策楞等至藏細加體訪如其人實無他能聽受約束卽量子爵秩伊向來本分所有不必有所增亦不必有所減使仍其舊足矣伊並非有功何得遽封郡王當時頗羅鼐亦由公爵以

漸而加郡王非其本爵也此處著策楞岳鍾琪著實留心若因我
二大臣已許彼爲王而今不封伊因致失望卽聲其不救護駐藏
大臣之罪相機加之顯戮此在策楞等相度事宜從長熟計總宜
虛公不設成見不可草率辦理看來經理善後諸事非班第所能
勝納穆扎爾亦不甚踴躍若策楞等辦有章程則伊等尙能守而
不失耳至珠爾默特那木扎勒之子必不可留其所有贖產歲入
必極豐厚若入官爲駐藏大臣公用足供駐兵千人而有餘至此
番統兵進藏固爲揆擒逆黨如能就擒重治其罪誠足洩忿若令
遠遁準噶爾則斷不可懸師深入窮追但格隆事務於事權極有
關繫必須駐藏大臣管理呼應方靈卽如珠爾默特那木扎勒一
言而塘汛斷絕班第達一言而塘汛復通信息往來惟藏王之言
是聽而駐藏大臣毫無把握如此卽駐兵萬人何濟於事策楞岳

鍾琪到彼目擊情形務須將此事徹底熟籌得其肯綮令自我出方爲扼要將來不但西藏應留兵駐守卽打箭爐爲西藏咽喉亦應添駐重兵以方今時勢言之國家全盛之力豈以添兵多費爲虞耶見交議政王大臣會同軍機大臣等詳悉定議可並備細傳諭策楞岳鍾琪等知之○命傅清拉布敦家屬各賞銀一萬兩○

調木和林爲左都御史以伍齡安爲禮部尙書雅爾哈善爲戶部侍郎王師爲江蘇巡撫

由浙江布政使遷

○丁巳諭策楞見在統兵進藏

四川總督印信著伊帶往以便調遣陝甘總督印信著尹繼善帶往成都行川陝總督事料理軍機錢糧及一切事宜其陝甘總督衙門事務著照黃廷桂之例令鄂昌護理尋常事件照例承辦案件重大者仍行關白尹繼善○諭下五旗大臣軍前效力年久者原有擡旗之例原任左都御史拉布敦除亂以靜地方以國家之

故忘身效力特加恩將拉布敦之子及同在一旗之子弟俱擡入
正黃旗滿洲以示朕酬功旌勳之至意○諭軍機大臣等珠爾默
特那木扎勒兇悖肆惡恣行無忌本因向來威權太盛專制一方
致釀此患乃朕加恩過重有以縱之不可不追悔從前之不早爲
裁抑伊固兇暴性成亦因天朝先事疑其跋扈致伊益生疑畏如
鳥獸然人有傷之之意機心一動彼必先奮決而起在傅清等見
事勢已迫不可坐受荼毒思欲先發制人卓呢羅卜藏扎什之報
復加害出於所料之外其見事不爲不明就義不爲不勇爲國家
去一大患更爲有功然平心論之卻非辦事正理至若慮班第達
日後憑藉威勢復生事端是又以疑珠爾默特那木扎勒之道待
之矣卽令於策楞領兵入藏時聲其不行救護大臣之罪加以顯
戮於勢甚易然不光明正大與傅清拉布敦之誅珠爾默特那木

扎勒等耳番眾無知見珠爾默特那木扎勒誘至加誅並未明正其罪今又借擒捕逆黨之名圖害班第達天朝舉事如此誣詐將人人疑畏何以昭示大信是以明降諭旨令達賴喇嘛班第達知朕之辦事光明正大以釋其疑而安其心如班第達能遵朕諭旨奉我約束是乃實心恭順之人仍可委辦格隆事務永遠承受恩典如其敢行違抗則師出更爲有名乃至富不易之理然既有此旨則我領兵安藏之大臣益當諸事留心或彼不服而阻進兵之路或謬爲恭順引我兵入至其地而後別有所圖皆不可不慮及至珠爾默特那木扎勒叛產自應抄沒但伊吞併眾人財產致擁厚貲若槩行入官又似利其所有番眾不無滋議著策楞等逐一查明凡伊強占所得俱著給還本人珠爾默特策布登本非叛逆乃爲珠爾默特那木扎勒所誣陷且私遣人殺害而以病死捏奏

今既明知其受屈身死已將伊子仍封以公爵管理阿里克地方
令班第達傳朕諭旨如卓呢羅卜藏扎什由彼處奔逃令伊擒捕
其父所有家產爲珠爾默特那木扎勒所抄占者俱仍給還珠爾
默特那木扎勒自置財產自應入官供駐藏大臣之用所部人眾
或應分設頭人管轄統歸駐藏大臣節制及駐紮官兵安設塘汛
一切事宜該督等會同駐藏大臣悉心籌酌妥議具奏再朕於十
月初八日在開封批發傳清等奏摺諭旨曾否到藏並九月十一
日傳諭珠爾默特那木扎勒之旨俱於沿途驛遞詳悉查明查出
時將此二旨令班第達閱看仍將伊言語情形奏聞再有玉暑那
哈暑番人一種離藏甚近或可安插在藏爲駐藏大臣爪牙或令
伊換班赴藏護衛是否有益亦著該督妥悉具奏朕通盤籌酌必
當如此辦理方爲理直氣壯得綏服遠人正理番夷以詭詐反覆

之心窺測天朝惟待以不疑則彼亦不心懷疑貳王道蕩平無過
於此是以不待議政王大臣等定議卽降旨傳諭達賴喇嘛班第
達著將此旨並鈔寄策楞等閱看又諭達賴喇嘛辦理格隆事公
班第達曰朕向因珠爾默特那木扎勒素不信奉達賴喇嘛心懷
仇隙是以屢加訓飭豈知因朕諭而彼愈心疑駐藏大臣傅清等
亦因珠爾默特那木扎勒殘暴性成狂虐日甚終恐不利於達賴
喇嘛是以奮不顧身亟剪兇逆凡此皆以爲達賴喇嘛也今達賴
喇嘛肘腋之間除此隱患佛地肅清朕心深慰及卓呢羅卜藏扎
什戕害駐藏大臣經達賴喇嘛傳諭解散賊黨安撫難民地方得
以甯謐朕甚嘉之所有加恩賞賜物件已交駐藏侍郎納穆扎爾
齎送到藏示朕優眷之懷至珠爾默特那木扎勒本不應承襲郡
王因念頗羅需一生恭順效力是以施恩格外令其襲爵乃伊自

管理藏事以後肆虐逞威驕縱日甚又因朕許其撤回駐藏官兵
伊更自鳴得計荼毒所部番眾貪淫無忌且誣奏伊兄珠爾默特
策布登叛逆派遣格隆領兵殺害伊兄屠戮其子及眾頭目等又
抄占班第達家產離其妻分駐後藏而羈留其子隨侍左右復阻
絕沿途塘汛計欲盡害官兵罪惡不可勝數然朕靜而思之此固
由珠爾默特那木扎勒賦性兇頑亦因朕之加恩過厚有以縱之
藏地之人雖怨彼而以朕所封之王不敢如何朕實深爲追悔由
今觀之辦理格隆之人權勢不可使太專是乃朕加恩永輯藏地
億眾生靈之要道也傳清等誅珠爾默特那木扎勒時雖有令班
第達管理藏地之語實未奉朕諭旨止因藏地不可一日無人統
率亦欲其卽統兵相助是以從權委辦使班第達果如所約翦除
逆黨能使二大臣無事藏地甯靜則卽如二大臣所言亦未爲不

可今伊旣不能救護駐藏大臣亦不爲無過第念其勢孤力弱僅保自全尙屬人之常情事在已往姑置勿問豈可自居其功承受朕封王之異恩乎著仍以公爵辦理達賴喇嘛格隆事務總督策楞等到藏之日會同達賴喇嘛於彼處頭人內曉事安分而番眾素所信服者再採擇一人爲格隆與班第達協同辦事其所屬尋常細事仍聽格隆二人照舊承辦至具摺奏事及兵備驛遞等事務則令欽差駐藏大臣會同格隆二人辦理鈐用欽差大臣關防永爲定制其駐防官兵安設臺站及一切事宜著總督策楞提督岳鍾琪侍郎兆惠駐藏大臣納穆扎爾班第等會同達賴喇嘛及班第達等悉心籌酌妥議具奏再珠爾默特那木扎勒從前曾經誣奏伊兄珠爾默特策布登謀叛構釁稱兵暗加圖害而以病死捏奏今事旣明白珠爾默特策布登本無罪之人抱屈被害應爲

昭雪著班第達查明伊子傳朕諭旨復給以公爵令管轄阿里克地方眾番黽勉效力如卓呢羅卜藏扎什由阿里克一帶奔逃令伊盡力擒拏伊父向來所有家產贖財爲珠爾默特那木扎勒所抄占者俱著查明給還再本年初八日封發傳清拉布敦之諭旨又九月十一日傳諭珠爾默特那木扎勒之諭旨或因珠爾默特那木扎勒之亂驛站阻隔尚未到藏亦未可知如已到藏卽著班第達開看辦理如尙未到著班第達於沿途驛遞查出令其閱看朕治天下臣民功過分明輕重各當班第達果能實心恭順進藏官兵妥協接應將來與新設格隆同心一意事事秉公辦理則爲國家腹心之臣可永享昇平之福承受恩典用是開誠布公特頒諭旨明白曉示班第達奉到此旨何以奉行處卽著速奏並諭藏內番眾知之○以和其衷爲浙江布政使范時綬爲安徽按

察使

山東濟東道遷

○實協辦大學士吏部尚書梁詩正工部尚書孫

嘉淦兵部侍郎汪由敦四川總督策楞閩浙總督喀爾吉善恩蔭

○甲子諭軍機大臣等據阿思哈議奏通省城垣等項工銀一摺

已令原議大臣議奏至所請應修城垣隄埝各工曉諭百姓分段

築修照社穀之例分別獎勵等語則於辦公之道未協蓋所在工

程百姓不知愛護肆行作踐以致損塌傾圯該督撫等自可隨時

諭令修築保護然亦惟些小工程小民力所能勝及原應民修者

量爲勸輸尙屬以民衛民本意若工程浩大需費繁多一切責之

於民雖設獎勵之條勢必轉滋擾累蓋今古民情不同未可繩以

力役急公之義不應如此辦理原議大臣俟各省奏到之日彙齊

議覆爲時尚早將此先行傳諭該撫知之○富明因事降調以富

勒赫爲河南布政使

由直隸熱河道遷

○乙丑諭朕頻歲巡幸直省問俗

觀風一遵

祖制入疆考績既足利益民生而厲從官兵亦得練

習勤勞修明紀律所關甚鉅也所有行營供頓悉出內帑絲毫不以擾民道路橋梁原准開銷正款且更特賜公項俾通融協濟該督撫等量力措辦儘足敷用卽或以大員俸入旣豐稍效惓忱尙非必不可行之事從未有出於捐輸紳民者今歲時巡豫省見所司辦理非該撫及二三大員等力所能供因逐日召進藩臬道府等隨時詢察伊等奏對之間皆有畏首畏尾之意朕知其辦理不善詢之該撫而鄂容安初尙欲含糊了事及加嚴詰乃一一據實奏明出自通省士民捐輸朕本欲卽治其罪念伊父大學士鄂爾泰宣勞有素伊在巡撫任內二年以來頗改其好名舊習而諸事龜勉出力且因朕問亦卽據實奏明尙與始終欺隱者有閒是以降旨切責姑免其交部議處至於富明身任藩司與該撫同辦

理乃於朕回鑾日援藩臬三年期滿之例奏請來京陛見朕當卽降旨伊於行在屢經召對不應遽請陛見顯係取巧乖張交部察議且明指其非出於糊塗拘泥必因見朕深責鄂容安故爲此奏如准其來京遂得於召見時乘機卸責此其巧獐居心殊不可問令軍機大臣等傳旨申飭富明令其明白回奏今回奏摺內果稱諸凡與撫臣會同商酌並無異議是鄂容安辦理此事竟爲富明所賣不能逃朕洞鑒矣富明已照部議降調朕在中州時見該撫不能仰體朕心冒昧辦理恐江浙督撫等聞風效尤將以觀風布澤之盛典轉成地方官科斂累民之私計因卽遣兆惠等由開封馳至江浙宣布朕意使督撫知所儆戒今兆惠回京覆奏江浙督撫並無派累朕心稍釋朕爲海內蒼黎竭免正供至數千萬金尙所不惜豈因省方盛舉轉惜多費此數十萬金而乃須民力捐輸

耶卽謂感恩趨事實出羣情所願而農民非富商可比該督撫亦應明諭朕旨早行禁止方爲知輕重之大臣豈可因循從事著將朕在中州訓飭鄂容安並因富明前奏傳諭鄂容安各諭旨宣示中外俾共知朕意科道等惟以摭拾陳言及枚舉細故爲盡職似此有關政體之事何不參奏著通行申飭朕已明頒諭旨亦不必再瀆奏矣○永興丁憂以阿里袞爲湖廣總督調阿思哈爲山西巡撫衛哲治爲廣西巡撫以定長爲安徽巡撫周人驥爲西安布政使沈世郁爲湖南按察使

由廣西左江道遷

○丁卯命暫停八旗米局收買米石○策楞等奏十月二十日接據通判常明等稟稱珠爾

默特那木扎勒誅後公班第達暫理藏務干戈遂息都統傅清等被難時見存兵八十餘名百姓一百一二十人齊赴布達喇俱係達賴喇嘛給銀養贍至二十三日公班第達告知已將逆首卓呢

羅卜藏扎什拏逆黨已獲過半劫去餉銀亦追出大半通司岡等處已安常明暨兵民等於二十四日搬回居住前所調大兵似可無庸進發請止帶兵八百名進藏仍酌留官兵駐打箭爐彈壓報聞○以世貴第一桂德保俱爲內閣學士

世貴第一桂由大理寺卿德保由翰林院

侍講學士

○戊辰諭軍機大臣等前因岳濬在巡撫任內並不實心

任事且瞻徇屬員於侵帑婪贓各案漫無覺察已降旨革職俟伊到京之日問明情節從重治罪並令派修城工效力贖罪伊父岳鍾琪亦深自引咎奏請將岳濬交部治罪本無可寬但念岳鍾琪一聞西藏之信親自帶兵迅速前赴急公宣力甚屬可嘉伊年老遠行未必不爲伊子之事心切憂懸著加恩將岳濬應行治罪之處寬免並免其修理城工遇有京堂缺仍欲量加擢用以爲老臣戮力封疆奉公體國者之勸將此傳諭岳鍾琪知之○己巳尙書

劉統勳奏查審參革廣東糧驛道明福折收倉米一案據明福供稱前任各道俱如此折收除明福見在審明定擬另題外查前道朱叔權朱聖閑李方勉前護道薛韞金允彝等任內均有浮收米石惟前道龐嶼任內查無折收之事再查站船水手工食歷任俱有曠缺應併贓論罪除朱聖閑金允彝病故毋庸擬罪仍追銀兩入官龐嶼止有曠缺工食銀二十八兩零應照律杖流雜犯准徒四年薛韞任內浮收三百二石七斗零應擬斬雜犯准徒五年朱叔權任內浮收五百四十五石零李方勉任內浮收八百四十三石零應擬斬監候除龐嶼並無浮收免其提解外薛韞等應令押解來粵訊明追贓究擬其不能覺察之督撫藩臬及聽從浮收之各州縣均請旨議處得旨薛韞前任御史時屢有封奏朕因其人尚鯁直擢用道員自應嚴於律己益礪清操方不負簡任之意乃

於本任內違禁浮收婪贓入己若不嚴加治罪則凡屬言官平時矯矯自命以圖受知及莅外任竟不能潔清自矢是轉以繩糾爲捷徑矣薛韞著革職交刑部從重治罪朱叔權李方勉雖侵收之數浮於薛韞然二人本由外吏擢用無足比數俱著革職押解往粵交與該督撫質訊明確按律追擬已足蔽辜龐嶼侵收之數甚少且已爲添補賞貼之用並未入己著從寬免其革職治罪其歷任州縣各官被勒折交情尙可原俱著從寬免其察議王安國等著議處具奏餘著覈議具奏○命八旗米局減價平糶

十二月庚午朔尙書劉統勳題查審明福實多折收米價銀二萬五千餘兩水手曠缺工食銀一千二百餘兩照律擬斬監候追贓入官其聽從折輕之府州縣交部議處前任督撫潘臬交部察議得旨三法司覈擬具奏吳謙銑見任藩司於糧驛道有統轄之責

乃一任明福浮收勒折婪得多贓毫無覺察著交部嚴察議奏其
州縣各官俱係明福屬員不無抑勒情節尙有可原且俱經自行
稟首著從寬免其議處○壬申諭漢大臣廕生向無分部學習之
例梁詩正孫嘉淦汪由敦之子所得廕生出自朕格外特恩著卽
分部學習額外行走俾得諳練部務○癸酉以吳拜爲盛京工部
侍郎由內閣學士遷○庚辰命舒赫德查勘浙江海塘○壬午協辦大學
士吏部尚書梁詩正之父梁文瀛年屆八旬賞給一品封典○乙
酉以吳達善爲內閣學士由光祿寺卿遷○戊子調朱一蜚爲廣東布政
使以多綸爲山西布政使張之淩爲山西按察使由甘肅涼州道遷○癸
巳諭軍機大臣等嚴瑞龍密參唐綬祖巧詐營私一摺贓私纍纍
款證俱有實蹟朕素知唐綬祖居心巧詐不足信但伊由革職問
罪之員因其尙能辦事破格擢用至畀以巡撫重任稍有人心宜

如何感激圖報乃敢徇私婪索肥瘠累商深負朕恩嚴瑞龍素係拘謹不肯任怨之人其參奏情節料非虛捏目下永興旣已回京唐綏祖見護督篆無大員承審著將嚴瑞龍原摺鈔寄該督阿里衮令其速赴新任到任卽宣明此旨將唐綏祖解任查明任所賞財並摺內有名人犯嚴審足議具奏湖北巡撫印務卽著布政使嚴瑞龍暫行護理○丁酉諭承襲王公坐次仍照原封特恩賞封者具奏請旨著爲例○是月駐藏副都統班第奏臣於十二月二十一日至藏查訊起事情形備知十月十三日傅清拉布敦將珠爾默特那木扎勒傳至寓中上樓相見時傅清拔刀剝殺珠爾默特那木扎勒並殺其隨從四五人卓呢羅卜藏扎什聞信卽跳樓而下往喚同黨聚兵圍樓施放槍礮傳清遣人往傳班第達救護班第達因力薄不能救護奔造達賴喇嘛隨使人攔阻賊黨並不

聽從放火燒房傳清身中三傷立即自盡拉布敦中傷更多爲賊所害主事策塔爾參將黃元龍亦皆自盡筆帖式齊誠自刎未死通判常明亦中矢石傷陣亡千總二員兵四十九名家人商民七十七人庫銀被搶卓呢羅卜藏扎什等乘間逃走次日達賴喇嘛收聚餘兵安撫眾人公班第達擒獲卓呢羅卜藏扎什等十三人監禁臣嚴加刑訊又供出夥賊德什奈等十四人於二十五日將卓呢羅卜藏扎什等正法報聞○是歲朝鮮琉球緬甸來貢○會計天下民穀數各省通共大小男婦一萬七千九百五十三萬八千五百四十名口各省通共存倉米穀三千三百一十九萬九百石六斗四升八合六勺零